

第陸册

卷十一

宦績

卷十二

列傳

甯陽續志

民國二十年一月補刊

甯陽縣志卷十一

歷代宦績傳

序曰邑之有官師民之庇而士之式也太史公傳循吏後之史家並因之矧縣志僅一邑之書而可忽諸甯陽爲先賢高子舊治之邦不言之化傲弟革心蠶絲蠨匡詠歌勿絕至今猶有甘棠之思焉厥後文明著稱於唐室伯玉報最於金源歷代以還循良間作鳴琴戴星殊塗同軌乃至祠廟碑碣歸然林立何其盛也自我

朝申建祠立碑之禁故雖庚桑化洽而尸祝無聞其前代

故物亦摧剝於荆榛瓦礫之中要其流風餘澤未可泯也舊志宦績附入職官志中今依省府各志例作宦績傳並補其缺佚著於篇其崇祀本邑名宦之巡按御史宋公學宋總督李公廕祖宋公昌祚巡撫李公鈞學政趙公申季及東兗道萬公象春分司主事張公盛陳公良謨吳公鵬游公季勳胡公瓚亦併錄焉

東周

謝息

公斂處父

先賢高子

謝息魯人昭公七年爲成宰時孟僖子從公如楚晉人

來治杞田季孫將以成與之息不可曰人有言曰雖有

挈瓶之智守不假器禮也夫子從君而守臣喪邑雖吾

子亦有猜焉季孫曰君之在楚於晉罪也又不聽晉魯

罪重矣晉師必至吾無以待之不如與之間晉而取諸

杞吾與子桃成反誰敢有之是得二成也魯無憂而孟

氏益邑子何病焉辭以無山足徵成與之萊柞乃遷於

桃即漢之晉人為杞取成左傳後成旋歸

公斂處父一名陽蓋慕晉大夫陽處父之魯人定公八

年為成宰時陽虎方執國命欲去三桓以季寤更季氏

以叔孫輒更叔孫氏己更孟氏冬十月壬辰將享季桓
子以蒲圃而殺之戒都車曰癸巳至處父告孟僖子先
爲供亂作桓子逃入孟氏虎劫公與叔孫武叔以伐孟
氏處父帥成人自上東門入與陽氏戰於南門之內弗
勝又戰於棘下陽氏敗虎竊寶玉大弓以出謂其徒曰
魯人聞余出喜於徵死奚暇追余衆曰嘻公斂陽在處
父遣之孟孫弗許左傳

高舌柴字子羔齊人鄭元曰孔子弟子爲成宰成人

有兄而不爲衰者聞子羔將爲宰遂爲衰其德感如

此唐封共城伯宋進侯從祀聖廟崇祀本邑名宦祠

論曰甚矣民之難以權驅而易以德感也德感豈市惠之云乎身教而已成人蔑視其兄乃至輕視其死而不爲衰平時頑傲弗謹不問可知夫邑不能一日廢官也當其兄未死與方死之時成獨無宰乎乃悍然不顧若是子羔特將爲成宰耳猶未爲宰也彼傲弟亦第聞之而已何以潛移默奪若是速哉此非畏宰也畏子羔也亦非畏也愧也記有之高子皋之執親之喪也泣血三年未嘗見齒君子以爲難自古孝於親者未有不敬於

兄者也其善執親喪者未有不善執兄喪者也以不爲
兄衰之傲弟遇善執親喪之孝子未有不愧積於中跋
踏而無地自容者况又赫赫然臨之以宰乎

唐

庾 賁

庾賁字文明潁川

舊志作榆次誤
今按德政頌改

人大曆中由任城尉

擢龔邱令宣慈務寬訓儉示德三年課最邑老彭滔等

立石頌德李陽冰撰德政頌

見藝文

碑存今縣署崇祀名

宦

後唐

孔仁玉

孔仁玉字溫如孔子四十三代孫父光嗣遭唐末世亂
爲灑掃戶孔末所害仁玉生甫九月母張抱匿外家得
免比長姿貌雄偉兼通六藝尤精春秋之學時末已冒
聖裔襲公爵兼曲阜令明宗長興元年魯人愬於官曰
末非孔子後仁玉乃光嗣世嫡真聖裔也是時仁玉年
十九官廉之確乃奏誅末授仁玉曲阜主簿尋遷龔邱
令龔封文宣公治有惠愛吏民悅服後改曲阜令兼監

察御史卒贈兵部尙書

曲阜志

金

王珩

齊希文

完顏阿合速

王珩字伯玉黎陽人初由進士調上蔡尉再任亳州酒

監所至有聲大定九年擢龔令

大定二十九年始改稱甯陽故九年仍爲龔

公勤廉恕聽斷明決公餘築綵衣亭以奉二親篤於孝

友邑人化之祀名宦

齊希文字公幹保州人明昌甲寅進士泰和中除甯陽

令

泰和爲金章宗年號在大定二十九年後故稱甯陽

奉公履正四境晏然犬不

夜吠祀名宦

完顏阿合速朔郡人蓋金宗室疏屬也甯陽故龔邱地

歷唐宋為名縣正隆末

海陵煬王年號

盜起軍興邑為殘毀大

定四年阿合速為縣尉崇修廨宇百廢俱興守正不阿

庭無滯獄有去思碑

元

韓珪 劉允 靳良弼 孔思曄

韓珪字文器汶上人泰定中由國子助教為甯陽尹兼

管本縣諸軍與魯事有文學多政績曾作本縣歷代沿

革記

見藝文

劉允中山人至正七年爲縣尹先是寇騎焚掠縣治廨

舍盡燬允出俸倡民修之工未訖代去梁彥謙宋郁相

繼爲尹始克葺事祭酒王思誠撰記

見藝文

靳良弼字夢臣幼習國語司倉稅累官縣尉有聲順帝

至元中爲縣主簿時文廟荒圯良弼首倡重修親督工

役民不擾而事集閱月葺事李惟明撰記

見藝文

孔思晦字明道孔子五十四代孫嘗受業張廋之門家

貧躬耕自養力學不懈遠近爭聘爲師至大中舉茂才

爲范陽教諭延祐初調甯陽學先是兩縣校官率以廩薄曠職思晦獨儉約自持教養有法比代去學者皆不

忍舍仁宗命龔衍聖公卒諡文肅

舊志列思晦於至大教諭而佚其事績今

依元史儒林

張盩傳補

明

宋學朱

萬象春

張盛

陳良謨

吳鵬

游季勳

胡瓚

王文珪

孔公朝

翟弁

王鉉

趙容

趙瑤

郭完

白麟

紀洪

秦吉士

陳本儒

何玉德

尹校

許恩 李沐民 李之庚 濮陽瑾 宋參

李楨 程時言 張雲漢

宋學朱字用晦長洲人明崇禎中以監察御史巡按山東十一年

大兵入畿輔徇山東將薄濟南巡撫顏繼祖被旨移鎮德州阻河以守率麾下兵三千往僅以羸卒五百及萊州兵七百人留守濟南兵備單寡人情恟懼學朱時方按部東出至章邱聞警投袂起曰省會重地藩封在焉而兵少如此緩急尙足恃乎乃介馬馳入省城七疏請

援兵而大璫高起潛者方握重兵翱翔東昌臨清間不發一旅東向事且急學朱請於德藩出內帑犒軍鼓以忠義登陴誓死守

大兵築長圍肉薄急攻轉輸匱絕外援不至城破學朱與厯城縣知縣韓承宣俱殉焉明社旋屋贈卹不及福王南渡始贈大理卿

皇朝定鼎以子德宜官大學士贈如其官厯城建雙忠祠祀

學朱並祀承宣本縣祀學朱於名宦祠濟南道韓鎬者

承宣之孫也並祀本縣名宦祠

見王士徵雙忠祠記

萬象春字仁甫無錫人萬曆五年進士選庶吉士授工科給事中在諫垣前後七十餘疏多關軍國大計其請復建文年號加景帝廟諡尤爲時所稱出爲山東參政妖賊郭大通爲亂計塙之厯山西左布政使二十五年以右副都御史巡撫山東倭躡朝鮮濱海郡邑悉戒嚴象春拊循軍民饋運應機立辦中使陳增以礦稅至象春疏論其害福山知縣韋國賢忤增被侵辱象春力保持之增遂劾國賢沮撓象春黨庇詔逮國賢奪象春俸遂引疾歸起南京工部右侍郎未上卒贈右都御史

明節

史本傳按象春於萬曆十二年任東莞道十六年倡修文廟文昌閣學署並增置學田政績確有可紀故節錄本傳補入宦績

張盛字克謙宜興人成化中由工部主事任都水分司嘗修金口壩及埭城壩凡有益漕運者悉殫力爲之累官左參政

陳良謨字忠夫吉安人嘉靖初由工部主事任都水分司清介自持財利秋毫無所愛嘗積俸錢數百緡悉出爲公用尤好獎勵後進邑人士多從之遊翕然宗仰累官參政

吳鵬字萬里秀水人嘉靖初由工部主事任都水分司

廉潔精明政事文學一時稱最累官吏部尚書

按鵬晚附嚴嵩

其人本無足取但其為分司時政績自卓然可稱故初志為之立傳今存而不廢亦善善從長之例也吁以鵬之才即不附嚴嵩何遠不為尚書即不為尚書何損於鵬乃於得失進退之際忍之不堅持之不固遂致一朝失足千古貽羞抑獨何哉

游季勳字懋甫豐城人嘉靖末由工部主事為都水分

司器局冲雅沈敏有智略泉漕政務整飭著績累官應

天府尹

胡瓚字伯玉桐城人萬曆中由工部主事任都水分司

爲橋於甯陽

瓚有洗橋記見藝文

民不病涉贊治水侍郎劉東星

濬賈魯河故道益治汶泗間泉數百尋源竟委著泉河

史上之瓚治泉以一夫濬一泉各有分地省其勤惰而

賞罰之冬則養其餘力不征於官以功增秩累官左參

政 明史劉東星傳

王文珪浙東人洪武初知縣事時甯陽承元之敝戶口

減削隸版籍者止有八社文珪言之大吏始割正縣界

逋亡盡復至今賴之見李伯貞分撥縣界記

見藝文舊志因記

有簿領是邑之文輒將文珪列之主簿非也按記云聖朝開疆之始首命浙東王文珪云云則爲縣令明甚且

分畫縣界事之大者亦必非丞佐以下所能任也今改正

孔公朝樂清人永樂中知縣事坐與同僚飲酒忿爭並遣戍部民屢叩閭乞還不許宣德二年詔求賢有以公朝薦者甯陽人聞之又相率叩閭乞公朝帝顧謂尙書蹇義曰公朝去任已二十餘載民奏乞不已此非良吏

邪可卽予之

明史循吏傳 舊志不載此事僅著孔朝之名於宣德間知縣而脫一公字蓋第知

後之復任而不知永樂時之被譴

翟弁字文冕涇陽人天順中由舉人知縣事禮賢興學剔弊鋤奸吏憚其威民樂其業時有鳳凰鳴於邑西北

之雲山人以爲善政所感祀名宦

王鉉順天人成化中由進士知縣事法令嚴明豪右無敢犯創建預備倉以資振卹後累官至參政

趙容和州人宏治初由進士知縣事敏於政治崇儒術捐俸拓學舍以課生徒兼設陰陽醫學尋擢知冀州

趙瑤容河人宏治末由進士知縣事諳習法律吏莫能

欺案無留牘治聲與和州

前趙容

瑄尋內擢御史

郭完霸州人正德中由選貢知縣事恢廓不拘小節而清介自持對客揮毫文采清綺注意愛民桁楊不設以

催科考殿拂衣竟去行李蕭然邑人爲立去思碑

白麟盧龍人正德中由進士知縣事嚴明果斷事無留滯以政績茂著調知章邱縣

紀洪榆林人由監生除易州判擢知定陶縣正德中以才堪治劇調知本縣事律已嚴潔蒞政明敏有古循吏

風時當流賊

劉六劉七趙燧等

蹂躪之後邑幾爲墟洪繕城郭

興學校修廢墜廣儲蓄凡有約束吏民奉之如神盜賊遠遁薦章累上時方望其進用遽卒於官無不惜之

秦吉士字子敬曲周人正德中由進士知縣事性廉直

治有威惠均賦平徭尤勤聽斷蠹吏袁以奎盤踞作奸
遽置之法猾胥股栗宿弊一清盜賊遠徙比閭案堵秩
滿內遷吏部主事累官布政使邑人爲立去思碑濟甯
王湘撰記

陳本儒藍山人嘉靖初由舉人知縣事爲人有心計初
不習爲吏後莅政精明處事周密上無得指其隙下不
得售其詐嘗毀淫祠建南察院署尋以憂去

何玉德字彥貴雄縣人隆慶初由進士知縣事才諳敏
瞻勤於政治儲蓄有法聽斷平允倉有餘粟獄無滯囚

公署學舍多所營建尋遷南京御史

尹校號印石錦衣衛人由進士初授行人擢南京湖廣道御史隆慶初左遷知縣事潔己愛民表裏如一冬雪愆期徒步出郊詣社稷壇虔誠籲禱祥霽立布莅政半載吏戢民和內遷刑部主事老稚攀轅臥轍幾不能行建祠立碑頌遺愛者久而弗輟先是校初視事卽慨邑乘未備將謀倡修聞王正容舊志云翥亭乃正容別字已撰次成帙尙未付梓瀕行猶留俸貲以助工費後累官福建參議

尹公後任卽李公貞是爲甯陽創修縣志之始

許恩絳州人萬厯初由舉人知縣事練達時務洞悉民艱勤於奉公官庖自給日惟蔬羹脫粟而已邑舊惟土城歲修勞費恩設法勸民量力捐助悉蠲以甄民樂趨事三月而畢尋以憂去邑人至今思之累官南京戶部郎中

李沐民字德明別號寰愉臨汾人萬厯中由進士知縣事外嚴內寬治有威惠在任六年重學校清保甲尤勤撫字時權採中使四出所至騷擾沐民持以鎮靜民賴以安尋遷南京戶部主事邑人爲立去思碑

李之庚真定人崇禎末以舉人知縣事智勇有幹略勤政愛民時饑饉頻仍盜賊充斥所在焚掠之庚撫綏殘黎捕逐渠寇獲保境宇十五年

大兵南下趨兗州游騎徇諸旁邑之庚糾合士民登陴拒守

大兵攻之力不能支城陷被執不屈殉焉明社旋屋贈卹不及

皇朝康熙癸巳

五十二年

追襲前明殉節諸臣邑人始請祀名宦

濮陽瑾字良玉廣德州人天順中由歲貢廷試第一授

本縣丞值歲饑賑濟有方遠近賴以存活者衆當事欲

薦之以親老乞歸百姓遮道攀留數十里不絕舊志不載今依

省志補舊志宣德縣丞有濮瑾必係誤濮陽為濮亦

如公朝之為朝也年代亦與省志不合考舊志建置門

載瑾於成化間與知縣劉愷重修文

廟其抵任當在天順之末成化之初

宋參昆陵人洪武中為本學教諭博學善教尤邃於詩

兼通毛鄭之說時邑人順天府尹王賢翰林學士許彬

方為諸生參各授以詩經諄諄啟迪惟恐弗及後二公

皆以儒術顯名當世參之力居多焉

李楨金陵人明初由舉人為本學教諭性清介嚴重自

持動有準繩雞鳴而起督課生徒寒暑風雨無少間多
所造就上官推重之遷知溫江縣

程時言休甯人萬厯八年由舉人爲本學教諭學有淵
源教諸生爲文務抒心得力祛蹈襲之弊修學舍卹寒
俊繩檢多士動循規則遇有地方官非理凌藉必力與
護持偏偏不稍屈雖獲戾弗恤也陞杭州府通判諸生
爲立去思碑

張雲漢興平人明初由選貢爲本學訓導質直坦易與
人惟以誠感課士有程不躐等以求速化諸生有不能

自給者輒傾囊以贈室無斗儲不以屑意諸生德之陞

濟甯州學正

國朝

李廕祖 朱昌祚 李 鈞 趙申季 以上皆入祀本邑名宦祠

張光縉 何如龍 劉興漢 陳學夔 季廷銓

談汝瑛 熊 銓 李夢雷 張述孔 郭 撰

馬照藜 嚴象琳 張 撰 陳 淦 畢所諧

吳 嶷 李蟠根

李廕祖字繩武奉天鐵嶺人順治十一年以兵部尙書

出督河南直隸山東三省時豫東皆被水患而畿南又多盜警兼之旗逃窩引株連不絕廕祖撫綏有術釐剔有方三省地方皆賴靖謐嘗以會勘至省聞禁旅芻牧頗多驕橫有司徵解以時而弁伍留難反以後期需索一日微服立軍門察得其姦狀立寘之法遠近聞之莫不聳服又河工需柳歲不下數十萬東豪蠹居奇大爲民病廕祖廉得巨豪數人皆奏徙之遂除包攬屯買之弊按甯之鳳傳請免本縣歲辦沿河州縣賴之祀本邑蘇柳十八萬觔當在此時

名宦

朱昌祚字雲門高唐州人初以奉天籍康熙四年任直

隸河南山東三省總督

按三省總督順治六年初設駐直隸大名府十五年裁康熙元

年復設八年裁雍正六年設河南山東總督駐河南開封府十三年裁

值母喪請終制不

允遂以墨經視事釐奸剔弊加意撫綏時因圈地入旗

近畿之民不無失業昌祚抗疏極諫時宰乘機陷之遂

及於禍九年

聖祖知其冤

賜祭葬製碑以卹之追諡曰勤愍祀名宦

李鈞字長源奉天鐵嶺人原任安徽巡撫以疾致仕家

居康熙四十二年山左水災告儆

按縣志災祥門四十年汶水漲諸堤並

決田禾淹沒四十二年春大饑人相食夏大水奉

旨蠲賑又邑人史秉正出麥八十餘石賑濟鄉間亦

此年事舊志所云奉

前辛巳流離者也

旨命八旗有力人員赴山東協賑鈔奏請願出已貲以助遂扶

病東來擇被災最重之新泰縣冬春徂夏計口授食尋

病篤命其子純德踵而行之計活災民數十萬口以是

民感其惠建祠於羊流店復公請入名宦祠

按是年本邑被災亦

重又與新泰接壤蓋

亦被李公之澤也

趙申季字行瞻江南武進人康熙四十五年由翰林出

督山東學政

舊志通稱學道康熙四十二年定制由翰銓科道特差者為學院由部郎及外任升

轉者為學道雍正

四年始通稱學院

清廉恪謹苞苴請託一切屏絕校文

親加點定夜漏三下不少休體素羸積勞致疾遂不起

山左人士靡不痛惜至五十五年公請祀名宦

張光縉河津人順治中由舉人知縣事淡泊寡欲為治

不煩時當開創之始疊經兵燹流亡未集民氣索然光

縉撫摩勗育務崇寬簡有鳴琴臥治之風考績以老黜

去之日斧資不給邑人至今思之

何如龍別字二巖歙縣人順治中由進士知縣事仁恕

寬簡與民休息在任六年四境謐如因失察罷官去之日行李蕭然士民遮道攀留爲立去思碑

劉興漢字干帷汾陽人康熙中由進士知縣事學業賅博政事修舉邑乘自兵燹後簡編煨燼興漢開館重修燦然復備爲治虛心體察民艱因俗施治張弛有條時當哀鴻漸集多方勸墾戶口日增聽訟明決案無留牘上官知其能遇有他邑疑獄悉委治之多所讞定內遷大理寺行人士民赴送絡繹直達汶潁爲從來所罕見陳學夔字鹿胎莆田人康熙己酉舉人耿逆之變匿橘

園洲不受僞職尋以尙書任克溥薦擢知縣事

薦疏云昔賈賦

長安洛陽之紙頓貴今全節罵賊睢陽之齒猶存

以儒術飾吏治厝理裕如課

士若嚴師保民如赤子建文昌閣營先賢祠置奉祀生

築教孝亭旌孝子廬表孝婦閭頌聲四起譽滿上臺內

遷兵部主事初甯陽舊有社倉四十九所分建各社貯

穀備荒一切借貸生息由紳耆自爲經理學夔移歸縣

內官司出納以後遂成官穀非題請不敢擅動論者咎

之

季廷銓字冰壺泰興人康熙中由歲貢知縣事莅任十

年仁心善政淪浹四境輿情翕洽邑人建生祠於雲山之陽以清時卓魯製扁頌之

談汝瑛字玉葦鑲紅旗漢軍人雍正初由監生知縣事莅政明決待士有體調知聊城縣值大水爲災躬親巡視拯溺援沈備嘗艱苦不待申請遽開倉賑濟活饑民數十萬口卒以擅發獲咎遠近惜之

熊銓字司衡龍里人雍正中由舉人知縣事盡心撫字催科不擾倡修學宮課士如恐不及尋調知掖縣去之日士民攀送直達汶澣自劉公興漢後至此甫再見云

李夢雷字魚門長興人乾隆初由進士知縣事振作有爲慨然以教養爲己任因社穀歸官緩急難恃乃於三鄉復建三倉捐穀備賑又分設社學四所並於金羊山創建東山書院俾諸生游藝其中用資切廟邑乘自劉公興漢重修後中閔多年夢雷復加編輯今所傳舊志卽其手定

張述孔別字柯巖洛川人乾隆中由進士知縣事視民如子視士如徒視胥吏如僕聽訟諄諄若家人語不加訶責俟兩造各盡其詞徐爲析其曲直以片語折之訟

者輒冰釋求罷春秋佳日好騎款段馬控以白頭隸巡
行郊野遇田父下馬就樹陰語移時始去過村塾輒入
其中進師弟子詢其課業告以所易曉鹽鹽不倦初以
其長官也見者每趑趄久益相習若相忘焉縣北枕汝
水環隄村落舊稱沃壤旣因風沙壅積田沒而賦不除
民以大感述孔勘實申請題豁一方賴之博學工詩兼
精書畫公餘焚香閉閣率意作山水花鳥而題咏其上
時稱張公三絕致仕歸卒於家或云仙去

郭煥阜城人乾隆中由舉人知縣事爲政嚴明聽斷敏

決尤善治盜平時訶察蹤跡有捕輒獲雖鼠竊狗偷必
痛繩以法嘗獲一攫鷄賊再四窮詰屢施極楚賊忿曰
所攫止一鷄有何重罪折之曰設爾時置鑊鷄旁爾未
有取鷄舍鑊者賊語塞卒從重論嘗語人曰作令之要
惟在聽斷緝捕而緝捕尤亟小民終歲勤動所獲無幾
一遭竊劫卽不聊生故害民莫甚於盜官若愛民不得
不恨盜也在任數載宵小遠徙閭井晏然三十六年汶
決石梁桑安等口撰督修土隄工築堅完數十年恃以
無恐邑人至今思之

論曰善哉郭公之論治盜而推本於愛民也世之爲令長者深居簡出視小民疾苦不翅秦人於越人之肥瘠偶有以竊報者漠然置之迨以刳報則慮干參緝處分於是抑勒諱飾百計沮撓此非必其愛盜也正坐不愛民耳良農去草務絕本根非惡草也自護其苗也虎狼蛇蝎見者必殺非仇之也衛生之念迫斯除害之計決也今有人聞其鄰之被刳歎詫之已耳迨刳其家則必以全力與盜角欲得而甘心焉卽刳其子之家亦不異是令長爲一縣之父縣卽其家也縣之民皆其子也果

能視縣如家視民如子一聞盜警未有不輟七投袂捕
之惟恐不速惟恐不盡而懲創之惟恐不嚴者矣涓涓
不壅遂成江河毫末不折將尋斧柯跼蹐之雄自攫鷄
始世之煦煦爲仁養奸貽患者聞郭公之風亦稍知戒
哉

馬照藜大城人乾隆中由舉人署知縣事時當前官墮
弛之後蠹役盤踞爪牙森鋸擇肥而噬閭閻受害莫敢
控訴照藜抵任飭紀綱剔宿弊鈴束胥吏一以三尺繩
之咸惕息奉法繇是隨宜損益擇要興革不出旬月政

事煥然一新斷獄勤明案無留牘時有白日青天之譽
未久代去邑人製萬民衣織贈之至今見思

嚴象琳字琢齋乾隆中署知縣事持廉秉公請託路絕
重士愛民人至今稱之

張撰字修亭永定人乾隆末由舉人知縣事以儒術飾
吏治愛民敬士輿論翕然曾刻四書文稿士多傳誦

陳淦山陰人嘉慶中由監生知縣事悃幅無華務爲安
靜不輕受訟牒曰小民一朝之忿遲則自解一經傳質
爲累多矣旣受理則必爲速結曰訟久不結役之福民

之禍也在任數載案牘清簡羣隸至無以自活時有官
清如水役貧如匄之稱十八年教匪倡亂曹郡寇氛甚
惡鄰邑戒嚴淦倡率紳士糾合兵勇完堞繕備時太平
已久人不知兵風鶴震驚訛言四起一日夜間喧傳寇
至羣情洶洶淦登陴勵衆誓以死守退則具公服坐堂
皇語家人曰若輩自爲計寇至尸我於是旣而訛言頓
息寇亦尋殄居恆自奉菲薄布素不飾口儉以養廉不
濫取自不敢濫用也因公被議左遷果得脫然無累而
歸年七十餘卒於家

畢所諳文登人乾隆中由副貢爲本縣教諭訓課嚴明士林感悅兼明吏治大府深器重之課最以知縣擢用後累官道憲所至有聲

吳嶷字兼山常熟人嘉慶中署縣主簿性機警爲人短小精悍勤於吏治公餘垂簾靜坐以詩酒自娛不妄交接人有私謁輒正色拒之時論服其清峻累官浙江紹興府同知所至有聲

李蟠根任邱人乾隆中由監生爲縣典史律已清嚴不妄交接而勤於緝捕一時盜賊爲之斂跡人至今稱之

右謝息公斂處父據左傳補孔仁玉據曲阜志補孔
思晦據元史補萬象春胡瓚孔公朝據明史補宋學
朱李廕祖朱昌祚李鈞趙申季濮陽瑾據省志補李
夢雷以下新增餘併見初志及舊志

贊曰高子大賢德立化成庾務慈儉爰流頌聲王正
經界版章用宏孔有去思帝鑒輿情劉勸墾闢高野
深耕郭實仁愛政則嚴明拔去蝥賊嘉穀乃生陳惟
安靜無赫赫名民肥役瘠訟簡刑清羣賢著績竹素
垂榮

卷十一終

甯陽縣志卷十二

人物 列傳

兩漢

大小夏侯傳 夏侯勝 兄子建

王章傳

二鄭傳 鄭昌 弟宏

二戴傳 戴封 戴宏

二劉傳 劉梁 孫楨

戴 邴 徐 晏 劉 彬 周 順 增補

三國

于禁傳

南北朝

羊氏傳

羊

深

子肅

羊

敦

羊烈

羊

侃

子鵬

羊鴉仁

孟表傳

明

王賢傳

子大經

大綱

大綸

許彬傳

二吳傳

吳孟祺

吳崇禮

子以詢孫應泰

國朝

周爰訪傳

子仔世

治世

甯之鳳傳

朱克配傳

劉虎傳

黃恩彤傳

重增

甯陽縣志卷十二

人物

序曰鄒魯爲聖賢講道之邦其門弟子各以師說教授鄉里論者以爲文學出於天性甯陽去孔孟之居百里而近流芬餘潤霑溉未泯故在兩漢則有若大小夏侯王章二鄭二戴咸以經術致高位著風節名重當世而二劉祖孫亦各斐然以文章顯蓋其由來遠矣自典午渡江故家遺民大半相隨南徙河北陷失一淪於石勒再入於拓跋南北兵爭必先徐兗鄉校變而戰場方幅

化爲信楚絃誦遺風不絕如綫時則僅有泰山羊氏號稱冠族名賢輩出此外寂無聞焉雖以唐宋盛時之休養生息卒無以復兩漢風俗之美故人才爲之頓衰此亦古今大得失之林也靖康之變復入於金迭更兵燹版圖割裂迄元而僅餘八社若存若亡明初土宇漸拓士習漸復於是王許二吳諸公各以碩猷名德後先相望此外掇魏科通朝籍者濟濟如林我

朝定鼎之初甯以吏治周以文學朱劉以武功一時稱盛二百年來涵濡教澤其士大夫以名節相高其父兄教

子弟皆知勉之以學故科第蟬聯庶幾前代山川之靈
磅礴鬱積久而必發安見後之人才不如古所云哉舊
志人物傳分門別類殊失煩碎而其人之顯晦事之細
大亦雜出不倫敘次尤嫌陋畧今依史例首列歷代名
臣其餘則各以類從並補其缺漏汰其猥鄙著於篇

列傳

兩漢

大小夏侯傳

按前漢書儒林傳大夏侯謂勝小夏侯謂建

夏侯始昌魯人也通五經武帝甚重之時昌邑王以少

子愛上為選始昌為太傅年老以壽終族子勝字長公

初魯共王分魯西甯鄉以封子節侯

名恬共王子封甯陽侯見王子侯表

傳國四世故地理志甯陽注云侯國共王都曲阜甯陽在其西故曰魯西鄉乃陽字之誤也共王子有甯陽節侯不聞有甯鄉侯也再按王子侯表甯陽節侯武帝元朔三年封武帝紀元朔元年魯王餘薨二年詔諸侯王請與子弟邑者悉許之於是藩國始分而子弟畢侯節侯之封在此次推恩以後故其封以元朔三年但是時共王薨已二年矣今日別屬大河大河後更名東平故共王分封其子亦誤

勝為東平人

班書稱始昌曰魯人侯國統於王國也稱勝曰東平人縣統於郡也茲著其同族異

籍之由而必推本於節侯之受封及甯陽之別屬者以見始昌及勝實皆甯陽人也勝少孤好學

從始昌受尚書及洪範五行傳說災異後事簡卿

師古曰簡

姓卿名

又從歐陽氏問爲學精孰

與孰通

所問非一師也

簡音姦

善說禮服徵爲博士光祿大夫會昭帝崩昌邑王嗣立
數出勝當乘輿前諫曰天久陰不雨臣下有謀上者陛
下出欲何之王怒謂勝爲祆言縛以屬吏吏白大將軍
霍光是時光與車騎將軍張安世謀欲廢昌邑王光讓
安世以爲泄語安世實不言乃召問勝勝對言洪範傳
曰皇之不極厥罰常陰時則下人有伐上者惡察察言
故云臣下有謀光安世大驚以此益重經術士後十餘
日光卒與安世共白太后廢昌邑王尊立宣帝光以爲

羣臣奏事東宮太后省政宜知經術白令勝用尙書授
太后遷長信少府賜爵關內侯以與謀廢立定策安宗
廟益千戶宣帝初卽位欲褒先帝詔丞相御史與列侯
中二千石博士議立武帝廟樂羣臣皆曰宜如詔書勝
獨曰武帝雖有攘四夷廣土斥境之功然多殺士衆竭
民財力奢泰亡度天下虛耗百姓流離至今未復亡德
澤於民不宜爲立廟樂公卿共難勝曰此詔書也勝曰
詔書不可用也人臣之誼宜直言正論非苟阿意順旨
議已出口雖死不悔於是丞相義御史大夫廣明

師古曰蔡

義田 劾奏勝非議詔書毀先帝不道及丞相長史黃霸
廣明 阿縱勝不舉劾俱下獄久繫霸欲從勝受經勝辭以罪
死霸曰朝聞道夕死可矣勝賢其言遂授之繫再更冬
講論不怠至四年夏大赦勝出爲諫大夫給事中霸爲
揚州刺史勝爲人質樸守正簡易無威儀上以是親信
之嘗見出道上語上聞而讓勝勝曰陛下所言善臣故
揚之堯言布於天下至今見誦臣以爲可傳故傳耳朝
廷每有大議上知勝素直謂曰先生通正言無懲前事
復爲長信少府遷太子太傅受詔撰尙書論語說賜黃

金百斤年九十卒官賜冢塋葬平陵

地理志東平平陵屬濟南郡太后

賜錢二百萬爲勝素服五日以報師傅之恩儒者以爲

榮始勝每講授嘗謂諸生曰士病不明經術經術苟明

取青紫如俛拾地芥耳學經不明不如歸耕勝從父子

建

師古曰從父昆弟之子

字長卿自師事勝及歐陽高左右采獲

又從五經諸儒問與尙書相出入者牽引以次章句具

文飾說勝非之曰建所謂章句小儒破碎大道建亦非

勝爲學疏略難以應敵建卒自顓門名經爲議郎博士

至太子少傅勝子兼爲左曹太中大夫孫堯卒長信少

府司農鴻臚曾孫蕃郡守州牧長樂少府勝同產弟子
賞爲梁內史賞子定國爲豫章太守而建子千秋亦爲
少府太子太班
本傳

贊曰猗嗟夏侯世傳尚書長公嶽嶽學冠羣儒精通
洪範冥契元符知幾神會直諫忠輸力爭廟樂侃侃
陳謨吏劾不道臣罪當誅獄中講授守死靡渝去聖
未遠與孔爲徒

王章傳

王章字仲卿泰山鉅平人也少以文學爲官遷諫大夫

敢直言元帝初擢左曹中郎將毀中書令石顯爲所陷免官成帝立徵爲諫大夫遷司隸校尉大臣貴戚皆敬憚之選爲京兆尹時大將軍王鳳輔政章雖爲鳳所舉非鳳顯權不親附鳳

漢書本傳

上卽位數年無繼嗣體常不

平定陶共王來朝上遇之厚不遣歸國旦夕入侍大將軍心不便也會日蝕因言定陶王雖親當奉藩在國今留侍京師故天見戒宜遣王之國上不得已許之王辭去上與相對涕泣而決章以爲非是迺奏封事天子召問章對曰天道佑善灾惡以瑞異爲符今陛下以未有

繼嗣引近定陶王所以承宗廟重社稷上順天心下安
百姓此善事當有祥瑞何故致災異災異之發爲大臣
顓政者也今大將軍歸咎定陶王遣之國苟欲天子孤
立於上顓擅以便其私非忠臣也且日蝕陰侵陽臣顓
君之咎今政事皆自鳳出天子曾不一舉手鳳不內省
責反歸咎定陶王乎且鳳誣罔非一事也前丞相樂昌
侯商王商先帝外屬位厯將相國家柱石臣也守正不肯
誑節隨鳳委曲卒用閨門之事爲鳳所罷以憂死衆庶
愍之又鳳知其小婦弟張美人已嘗適人於禮不宜御

至尊託以爲宜子納之後宮苟以私其妻弟聞張美人

未嘗任身就館也且羌胡尙殺首子以盪腸正世師古曰盪

洗也言婦初來所生之子或他姓況天子而近已出之女也此三者皆

陛下所自見足以知其餘鳳不可令久典事宜選忠良

以代之自鳳之白罷商後遣定陶王也上不能平及聞

章言感悟謂章曰微京兆尹直言不聞社稷計且惟賢

知賢試爲朕求可以自輔者於是章薦中山孝王舅琅

邪太守馮野王上自爲太子時數聞野王先帝名卿聲

譽出鳳遠甚方欲倚以代鳳鳳聞之出就第上疏乞骸

骨辭旨甚哀太后爲垂涕不御食上少親倚鳳不忍廢
於是鳳起視事使尙書劾奏章知野王前以王舅出補
吏而私薦之欲令在朝阿附諸侯又知張美人體御至
尊而妄引羌胡殺子盪腸非所宜言遂下章吏廷尉致
其大逆罪以爲比上夷狄欲絕繼嗣之端背畔天子私
爲定陶王章死獄中妻子徙合浦自是公卿見鳳側目
而視

漢書元
后傳

鳳薨上還章妻子故郡章死不以罪衆庶

冤之自武帝置三輔吏民爲之語曰前有趙張後有三

王三王者王尊王駿及章也

節本
傳

哀帝初以災異召問

黃門待詔李尋尋對以自京兆尹王章坐言事誅滅智

者結舌邪偽並與外戚顓命君臣隔塞至絕繼嗣女宮

作亂云李尋傳 按班書本傳但稱為鳳所陷罪至大

漏略今兼錄元后傳與本傳合為一篇又本傳附載章

妻女事舊志既摘出另立一傳系諸列女而於章傳又

復敘入亦嫌重複且與章之忠謹大節無涉故刪之於本傳而仍歸列女傳中

論曰西漢文景武宣之業墮自元成恭顯為內官之大

蠹王氏憑恃椒房卒成篡竊而其顓權枋國實自鳳始

章以孤寒疏逖猥被知擢乃在元代則力詆石顯當成

朝則首彈王鳳卒致罪成文致命實囹圄含憤九幽之

死靡悔何其烈也以章之昌言亮節而班史略於本傳
詳著於元后傳者何哉以見漢之亡亡於王氏王氏之
興始於鳳鳳之橫由於元后而漢諸臣敢以直言攻鳳
者獨有章章死而鳳之權愈重王氏之勢漸成至於莽
遂移漢鼎焉章之繫於漢也重矣哉

贊曰仲卿骨鯁立朝致身乃心漢室不避權臣一忤
中令再劾將軍若探虎口徑批龍鱗天子曰俞太后
用瞋獄成鍛鍊魂化陰燐外戚輝赫士氣不伸卒移
玉步禍延巨君

二鄭傳

鄭昌字次卿泰山剛人也好學明經通法律政事宣帝

時

依帝紀

為太原涿郡太守皆著治跡

漢書鄭宏傳

帝感路溫

舒言詔置廷平以平庶獄季秋後請讞時上常幸宣室

齋居而決事昌上疏曰聖王置諫爭之臣者非以崇德

防逸欲之生也立法明刑者非以為治救衰亂之起也

今明主躬垂清聽雖不置廷平獄將自止

通鑑作正

若開後

嗣不若刪定律令律令一定愚民知所避奸吏無所弄

矣今不正其本而置廷平以理其末政衰聽怠則廷平

將招權而爲亂首矣宣帝未及修正元帝初迺下詔議律令可蠲除輕減者條奏成帝河平中復詔中二千石二千石博士及明習律令者議減死刑及可蠲除者令較然易知

刑法志

皆自昌發之方宣帝之以言事罪蓋寬

饒也昌時入爲諫大夫恐傷寬饒忠直憂國爲文吏所詆挫乃上書曰臣聞山有猛獸藜藿爲之不采國有忠臣姦邪爲之不起故司隸校尉寬饒居不求安食不求飽進有憂國之心退有死節之義上無許史之屬下無金張之託職在司察直道而行多仇少與上書陳國是

有司劾以大辟臣幸得從大夫之後官以諫為名不敢
不言上不聽遂下寬饒吏寬饒自到眾莫不憐之蓋寬饒傳

弟宏

宏字稚卿與兄昌齊名為南陽太守條教法度為後所
述遷淮陽相以高第入為右扶風京師稱之代韋元成

為御史大夫漢書本傳時京房奏考功課吏法元帝令公卿

朝臣與房會議宣室皆以房言煩碎令上下相伺不可
許惟宏及光祿大夫周堪初言不可後善之房嘗見上
言幽厲危亡由任用巧佞意指石顯出以語宏顯聞而

憾焉後伺知房與淮陽王舅張博謀令王上書求入朝

勸上行考功事並罷丞相元成以宏代之迺構房下獄

坐棄市宏免爲庶人

京房傳 按班書以二鄭合傳昌附於宏昌疏別見刑法志宏事別

見京房傳舊志因之而以昌疏附合傳之後殊紊亂失體裁今析爲二傳以兄先弟又班書謂昌用刑罰深不如宏平然律令一疏言簡意博元成因之遂定畫一之制仁人之言其利溥矣不得以深於用刑爲訾今傳削而不載併採入救蓋寬饒書以見昌之論議持平非徒直言敢諫也

贊曰二鄭碩儒難弟難兄明經通律並著漢廷昌歷

兩郡爰流政聲宏治三輔用法稱平帝曰予弼晉位

亞卿議行考課用杜奸萌憾由石令罪坐京生

一二戴傳

戴封字平仲濟北剛人也年十五詣太學師事鄧令東海申君申君卒送喪到東海道經其家父母以封當還預爲娶妻封暫過拜親不宿而去還京師卒業時同學石敬平病卒封養視殯殮以所齎糧市小棺送喪到家更斂見敬平行時書物皆在棺中乃大異之封後遇賊財物悉被掠奪惟餘縑七匹賊不知處封乃追以與之曰知諸君乏故送相遺賊驚曰此賢人也盡還其器物後舉孝廉爲光祿主事遭伯父喪去官和帝永元六年

依帝紀 詔書求賢良方正直言之士有至行能消灾伏異

者公卿郡守各舉一人郡及大司農俱舉封公車徵陛

見對策第一擢拜議郎遷西華令時汝潁有蝗灾獨不

入西華界督郵行縣蝗忽大至督郵其日卽去蝗亦頓

除一境奇之其年大旱封禱請無獲乃積薪坐其上以

自焚火起而大雨暴至遠近歎服遷中山相諸縣囚四

百餘人辭狀已定當行刑封哀之皆遣歸家與尅期日

無違者詔書褒美焉十二年徵拜太常卒官

後漢書

戴宏字元襄濟北剛人也

與封同籍同宗世系無考

父爲縣丞宏十

六從在丞舍時膠東相吳祐有知人之明每行園常聞

誦讀之音奇之與為友

後漢書吳祐傳

年二十二為郡督郵曾

以職事見詰府君欲撻之宏曰今鄙郡遭明府以為仲

尼之君國小人少以宏為顏回豈聞仲尼有撻顏回之

義府君異其對即日教署主簿

濟北先賢傳

後卒成儒宗知

名東夏官至酒泉太守

吳祐傳

悉為後漢何代人但吳祐與梁

冀同時會爭李杜之獄宏與為友則其時已在沖質桓靈間矣

贊曰觥觥平仲早有令名誼隆師友不媿死生德動

寇攘誠感髡黥治有異迹蝗徙雨零元襄幼慧不墜

家聲抱卷長哦如玉斯鳴名賢屬耳把臂心傾託喻
孔顏緬彼典型

二劉傳

劉梁字曼山一名岑東平甯陽人也梁宗室子孫而少
孤貧賣書於市以自資常疾世多利交以邪曲相黨乃
著破羣論覽者以爲仲尼作春秋亂臣知懼此論之作
俗士豈不媿心其文不存又著辨和同論文別錄

見藝文

桓帝時舉孝廉除北新城長告縣人日昔文翁在蜀道
著巴漢庚桑瑣隸風移碣磔吾雖小宰猶有社稷徒赴

期會理文墨豈本志乎乃更大作講舍延聚生徒數百

人朝夕自往勸戒身執經卷試策殿最儒化大行特召

入拜尚書郎累遷後為野王令未行光和中病卒

節錄范書

本傳

劉楨字公幹梁孫

後漢書

或曰梁子

文士傳

梁一名恭少有

清才以文學見貴終野王令

文士傳此皆謂梁舊志誤屬之楨

楨亦以

文才知名年八九歲能誦論語詩論及篇賦數萬言警

悟便捷所問應聲而答當其辭氣鋒烈莫有折者

文士傳

家居著魯都賦述東國風土之美詞極溫麗

見藝文

建安

中魏文帝爲五官中郎將及平原侯植皆好文學植與

山陽王粲北海徐幹廣陵陳琳陳留阮瑀汝南應瑒並

見友善

魏志

又與粲等及魯國孔融稱七子

典論

武帝爲

丞相辟爲掾屬

魏志

文帝嘗賜植廓落帶其後師死欲借

取以爲像因書嘲植曰夫物因人爲貴故在賤者之手

不御至尊之側今雖取之勿嫌其不反也植答曰植聞

荆山之璞曜元后之寶隋侯之珠燭衆士之好南垠之

金登窈窕之首鼉貂之尾綴侍臣之幘此四寶者伏朽

石之下潛污泥之中而揚光千載之上發彩疇昔之下

亦皆未能初自接於至尊也夫尊者所服卑者所修也
貴者所御賤者所先也故夏屋初成而大匠先立其下
嘉禾始熟而農夫先嘗其粒恨楨所帶無佗妙飾若實
珍異尙可納也楨辭旨巧妙皆如是由是特爲諸公子
所親愛典略選爲平原侯庶子時家丞邢子昂防閑以禮
與楨不合楨書諫曰邢子昂北土之彥少秉高節元靜
淡泊言少理多真雅士也楨誠不足同貫斯人並立左
右而楨禮遇殊特邢反疏簡觀者將謂君侯習近不肖
禮賢不足採庶子之春華忘家丞之秋實爲上招謗其

罪不小以此反側

魏志邢傳

植得書不能用其後文帝為太

子嘗請諸文學酒酣命夫人甄氏出拜坐者眾人咸伏

楨獨平視武帝聞之乃收楨減死輸作

典略

會武帝至尚

方觀作者見楨匡坐正色而磨石問曰石何如楨曰石

出荆山懸崖之巔外有五色之章內含卞氏之珍磨之

不加瑩雕之不增文稟氣堅貞受之自然顧其理枉屈

紆繞而不得申武帝即日赦之

文士傳

仍署吏楨著文賦

數十篇

魏志

平原侯植盛相稱譽以為振藻海隅握靈虵

之珠抱荆山之玉

與楊修書

文帝稱其於學無所遺於辭無

所假猶譏其壯而不密典論楨於建安二十二年卒文帝

選其遺文為一集及與吳質書深悼惜焉楨所著有毛

詩義問十卷文集四卷見通志今並未見按甯陽自古

稱首魏志附入王粲傳中寥寥數語其佚事乃散見於

文士傳典略典論及魏文帝陳思王各書中舊志採魏

志原文而更加芟節乃至不復成語茲採輯各書合為

一傳復以諫書答語併入篇中庶楨之文詞妙合尚可

見一斑云至楨之仕在漢獻帝建安之世其卒亦在建

安二十二年固始終漢臣也其與魏文帝及平原侯友

善特以文字見知在賓客之列及魏武為丞相辟為掾

屬乃以吏道進身東漢諸名士往往如是義無不可宋

嚴羽摘其詩中元后一語及王粲詩中聖君為訾比諸

荀彧高光之喻不知自春秋以來家臣稱大夫例曰主

君至漢則掾屬稱其長官曰府君后亦君也未聞漢以

後臣下有稱天子曰君曰后者安得以唐虞三代之舊

稱爲例卽如東漢順帝時甯陽主簿詣闕訴其縣令之
枉書語狂悖尚書劾以大逆虞詡駁之曰主簿所訟乃
君父之怨主簿可稱縣令爲君父掾屬不可稱丞相爲
君后乎羽知以春秋之義責楨祭而於東漢尊卑稱謂
尙未之考其持論亦無據矣謝靈運擬楨詩曰窮居晏
里閑少小長東平此言楨本寒士先未委贄於漢也又
曰河兗當衝要淪飄薄許京此傷楨遭漢末兵亂流寓
許昌也又曰廣川無逆流招納厠羣英此言楨以才爲
曹氏所羅致也吁此則知楨者矣 宋葛立方韻語陽
秋云建安七子劉公幹獨爲諸王子所親曹操威燄蓋
世甄夫人出拜諸人皆伏而公幹獨平視雖論作而不
悔亦可嘉矣梅聖俞詩曰公幹才俊或欺事平視美人
會不起自茲不得爲故人論作左校瀕於死公幹嘗有
贈從弟詩云亭亭山上松瑟瑟谷中風風聲一何盛松
枝一何勁其寄意如是豈肯少屈於操哉末篇又託與
鳳凰有何時當來儀將須聖明君之句則不以聖明待
操矣

論曰甯陽之有二劉猶扶風之有二班也梁彬彬儒雅
化起絃歌和同一論綽乎猶具西京稚圭子政之風洵
先哲之格言匪直詞林之盛藻也昔魏文帝稱楨五言
詩妙絕當時鍾嶸詩品亦謂其源出古詩仗氣愛奇動
多振絕真骨凌霜高風跨俗自陳思以下楨稱獨步如
孔門用詩則公幹升堂云

贊曰魯共王子侯於甯陽振振公族斐然有章曼山
著論擇精語詳執經課士儒道大昌公幹卓犖藻耀
高翔五言冠古金鏗玉鏘羞同黃雀自匹鳳凰遭時

不造淪泊許京

戴邗字子陵剛人仕至樂城令徐晏字孟平仕至潁陰

令二人並少有異才與蛇邱劉彬盧

清今長

汜昭夏隱皆

稱神童後漢桓靈之世時人號為濟北五龍

並見濟北英賢傳及

陶潛羣輔錄

漢魯峻治魯詩及顏氏春秋門人有甯陽周順

字承亨見峻碑陰

增補

三國

于禁傳

于禁字文則泰山鉅平人也東漢末黃巾起濟北相鮑

信招合徒衆禁附焉魏武帝領兗州禁爲都伯屬將軍
王朗朗異之薦禁才任大將武帝召拜軍司馬使將兵
攻廣威拔之拜陷陣都尉從破呂布於濮陽又別將破
高雅於須昌從攻壽張定陶離狐圍張超於雍邱皆拔
之從征黃巾斬其帥劉辟黃邵等盡降其衆遷平
尉從圍橋蕤於苦斬蕤等四將從至宛降張繡繡復叛
武帝戰不利敗還舞陰是時軍亂禁獨勒所將數百人
且戰且引徐行整隊鳴鼓而還道見十餘人被創裸走
問其故曰爲青州兵所劫初黃巾降號青州兵禁怒曰

青州兵同屬曹公而還爲賊乎乃率衆數其罪而討之
青州兵遽走詣武帝自訴禁繼至先立營壘或謂青州
兵已訴君矣禁曰今賊在後追至無時不先爲備何以
待敵曹公聰明訴必不入徐鑿塹安營訖乃入謁陳狀
武帝悅謂禁曰將軍在亂能整雖古名將何加焉於是
錄禁前後功封益壽亭侯復引攻張繡於穰禽呂布於
下邳別與史渙曹仁攻睦固於射大破之武帝初征袁
紹禁願爲先登乃選步騎二千人使禁將守延津以拒
紹紹攻禁不能拔禁乃與樂進等將步騎五千擊紹別

營從延津西南緣河至汲獲嘉二縣燔保聚三十餘屯
斬首獲生各數千降紹將何茂王摩等二十餘人復擊
紹別營於杜氏津破之遷裨將軍後從還官渡武帝與
紹連營起土山相對紹射營中士卒多死傷軍中懼禁
督戰氣益奮紹破遷偏將軍冀州平昌豨復叛遣禁征
豨豨降禁與豨有舊自臨與訣隕涕而斬之武帝益重
禁東海平拜虎威將軍後與臧霸等攻梅成成降復叛
以其衆奔陳蘭時張遼等討蘭軍食少禁運糧先後相
屬遂斬蘭成增邑二百戶並前千二百戶是時禁與張

遼樂進張郃徐晃俱稱名將每征伐行爲軍鋒還爲後
拒而禁持軍嚴整得敵財物無所私入由是賞賜特重
武帝嘗恨朱靈以禁有威重遣禁將數十騎齎令書徑
詣靈營奪其軍靈及部衆莫敢動乃以靈爲禁部下督
衆皆震服其見憚如此遷左將軍假節鉞分邑五百戶
封一子列侯建安二十四年樊城之役禁軍敗爲漢壽
亭侯所禽遂降後入吳還魏拜安遠將軍卒

魏志本傳
按禁晚

節不終但與張徐輩爲魏名
將戰功俱載國史不可沒也

贊曰桓桓文則拔自荆榛初從濟北威懾黃巾遭逢

魏武引拜領軍衆亂能整敵大愈振俘布摧紹解糾
 散紛名齊四將氣奪萬人晚值無敵面縛漢濱近慙
 龐德遠媿孟荀

南北朝

羊氏傳

羊深字文淵泰山鉅平人也

魏書深傳作平陽人國朝殿本魏書考證臣人龍

按北史羊祉傳祉泰山鉅平人本書地形志泰山郡有鉅平若平陽則屬高平郡又有陽平則屬魯郡當以鉅平爲是
 今改 晉太僕卿琇七世孫祖規之歸魏賜爵鉅平子

拜雁門太守父祉襲爵仕至平北將軍卒諡曰景深爲

祉第二子早有風尚學涉經史好文章兼長几案自司
空府記室參軍累轉駕部郎加右軍將軍於是沙汰郎
官深以才見留在公明斷肅宗行釋奠禮講孝經儕輩
之中獨蒙引聽時論美之正光末北海王顥討叛賊車
金雀等以深爲持節通直散騎常侍行臺左丞軍司仍
領郎中顥敗還京遷尙書左丞加平東將軍蕭寶夤反
攻華州王平薛鳳賢等聚衆作逆敕深兼給事黃門侍
郎與大行臺僕射長孫稚共會潼關規撫進止事平以
功賜爵新泰男靈太后幸邙山公卿畢會太后引見深

欣然勞問顧謂左右曰羊深真忠臣也孝昌末徐方多事以深爲東道慰勞使二徐行臺莊帝踐阼復爲二寇行臺深處分軍國損益隨機亦有時譽初爾朱榮殺害朝士深第七弟侃爲泰山太守遂率鄉人外託梁朝深在彭城忽得侃招深書遂斬使並書表聞莊帝降詔褒美令還朝面受委敕乃歸京師除名久之除撫軍將軍金紫光祿大夫元顥入洛以深兼黃門侍郎顥平免官後拜大鴻臚卿普泰中遷散騎常侍監起居注自天下多故東西二省官員委積前廢帝敕深與常侍盧道虔

等選人補定自奉朝請以下各有沙汰尋兼侍中是時

庠序廢替名教凌遲深疏請修國學並詔郡國興立儒

教廢帝善之出帝初拜中書令轉車騎大將軍左光祿

大夫永熙三年六月以深兼御史中尉東道軍司以上並節

錄魏書及帝人關深與樊子鵠不從齊神武句起兵於竟

州子鵠署深為齊州刺史北史於泰山博縣商王村結壘

招引山齊之民魏書天平二年正月東魏軍擊破之於陣

遇害舊志深傳全採北史故不著籍貫而不知北史深傳系社後不須重著也以為字文泉而不知延壽

唐人避高祖諱例改淵為泉也今依魏書而略加芟節似較詳備但魏書稱深與樊子鵠同逆而以東魏軍為

大軍蓋魏收為北齊臣故其言
云爾北史改書起兵得其實矣

論曰羊深可謂忠於魏者矣其不隨出帝入關也方在

東不及隨也其與樊子鵠據郡以拒東魏也非拒靜帝

也拒高歡也

即本傳所謂不從齊神武

歡逼逐出帝擁立靜帝雖奉

以號令實同囚繫招拔之祚危若繫卵故拒高氏者乃

不忍背魏者也惜子鵠舉事無成

郡守金公一鳳修府志列子鵠於雜傳大

謬深亦橫屍原野曾不數年而拈懸上天犢車就館魏

鼎既遷靜帝實命鳩羽焉悲夫

深子肅以學尚知名武定末為大將軍府東閭祭酒乾

明初爲冀州治中趙郡王爲巡省大使肅以遲緩不在職解朝議以肅無罪尋復之遷南充州長史武平中入

文林館撰書

舊志因此一語列肅文苑

出爲武德郡守

依北史及北齊書

羊敦字元禮社弟子也父靈引好法律爲京兆王愉長

史及愉作逆靈引遇害事平贈平東將軍兗州刺史諡

曰威

北史

敦性尙閑素學涉書史以父死王事除給事中

出爲本州別駕公平正直見有非法終不判署後爲廣

平太守治有能名姦吏跼躄秋毫無犯屬歲饑饉家餽

未至使人外尋陂澤採藕根而食遇有疾家人解衣質

米以供之然其爲治亦尙威嚴朝廷以其清白賜穀千斛絹百匹興和初卒吏民奔哭莫不悲慟贈兗州刺史諡曰貞武定初齊獻武王以敦及中山太守蘇淑在官清約宜追褒以厲天下乃上言請加旌錄詔曰昔五袴興謠兩歧致詠皆由仁覃千里化洽一邦故廣平太守羊敦故中山太守蘇淑並器業和隱幹用貞濟善政聞國清譽在民方藉良才遂登高秩先後凋亡朝野傷悼追旌清德蓋惟舊章可各賞帛一百匹穀五百斛班下郡國咸使聞知子隱武定末爲開府行參軍

舊志探北史而多變

節今依
魏書

羊烈字信卿靈引弟子也父瑩字靈珍仕魏爲兗州別
駕烈少通敏好讀書能言名理以元學知名孝昌末從
兄侃爲泰山太守據郡南歸烈潛知其謀深懼家禍與
從兄廣平太守敦馳赴洛陽告變朝廷將加厚賞烈云
譬如斬手全軀所存者大爾豈有幸從兄之敗以爲己
利乎卒無所受弱冠州辟主簿兼治中從事刺史方以
吏事爲亟以幹濟見知遷秘書郎齊顯祖初爲儀同三
司開府倉曹參軍事累遷尙書祠部左右民郎中在官

稱職除陽平太守有能名時頻有灾蝗犬牙不入陽平

境詔書褒美焉後為義州刺史以老疾還鄉周大象中

卒烈家傳素業閨門修飾一門女子不再醮於兗州造

一尼寺女寡居無子者並出家為尼咸存戒行時稱其

家法弟修有才幹大甯中卒於尙書左丞子元正武平

末為將作丞隋開皇中民部侍郎卒於隴西郡贊務舊志

本傳採北史而多芟
節今悉依北齊書

羊侃字祖忻祉子深第七弟也梁書本傳泰山梁甫人
按梁甫鉅平地本接

壤但其父兄皆鉅平人侃何得
獨為梁甫人乎南史因之並誤少而瑰偉身長七尺八

寸雅愛文史博涉書記尤好左氏春秋孫吳兵法

梁書初

爲尙書郎以力聞魏帝嘗謂曰郎官謂卿爲虎豈羊質

虎皮乎試作虎狀侃因伏以手抉殿沒指魏帝壯之賜

以珠劍

南史

正光中稍爲別將時秦州羌遮莫念生據州

反稱帝仍遣其弟天生率衆攻陷岐州遂寇雍州侃爲

偏將隸蕭寶夤往討之潛身巡塹伺射天生應弦卽倒

其衆遂潰以功遷使持節征東大將軍東道行臺領秦

山太守進爵鉅平侯

梁書

武泰元年明帝殂亡嗣靈太后

立皇曾孫故臨洮王世子釗爲帝大都督爾朱榮舉兵

入洛沈太后及幼帝於河殺王公卿士百官二千餘人

擁立莊帝遷之河橋將謀禪代已而不果侃聞之內懷

疑懼

梁書侃父每有南歸之志嘗謂諸子曰人生安可久淹異域汝等可奉歸東朝侃至是將舉河濟以

成先志南史因之

按魏書不立侃傳附見深傳云初

爾朱榮殺害朝士深弟侃性粗武遂率鄉人外託蕭衍

與梁書南史不同當是侃南歸後託言先志遂傳聞江

左故梁書採以入傳不若魏書之得其實也今依魏書

並據帝紀及

遂率鄉人外託於梁

梁書兗州刺史羊敦侃從兄也密知之據

州拒侃侃乃

率精兵三萬攻之弗克仍築十餘城以守

之南史因之

按敦未嘗為兗州刺史深時為二兗行

臺曾斬使上變故梁書誤以為敦又侃之外託乃是密

謀安有攻兗不克築城圍守之事如有其事何以魏書

深敦傳中均未敘及且十餘城亦非

梁朝賞授一與元

旬月所可就殊不近情今並從刪削

法僧同魏帝聞之使授侃驃騎大將軍司徒泰安郡公

長為兗州刺史侃斬其使魏人大駭令僕射于暉率眾

十萬及高歡爾朱陽都等相繼而至南史圍侃十餘重殺

傷甚眾柵中矢盡乃夜潰圍而出且戰且行一日夜出

魏境至渣口眾尚萬餘人將入南土士卒竟夜悲歌侃

乃謝曰卿等懷土梁書幸適去留各拜辭而去侃以大通

三年至建鄴南史考大通無三年南史稱大通三年

魏大亂中大通元年書以安北將軍羊侃為青冀二州刺史紀載甚明詔授安北將軍徐

州刺史並其兄默及三弟忱給元皆拜為刺史尋以侃

都督北討諸軍事出頓日城會陳慶之失律停進太尉

元法僧北討爲軍司馬軍罷入爲侍中五年封高昌縣

侯邑千戶出爲晉安太守閩越俗好亂侃至斬其渠帥

郡內肅清頓之徵爲太子左衛率

梁書

車駕幸樂游苑侃

預宴時少府新造兩刃稍成長二丈四尺圍一尺三寸

帝因賜侃河南國紫駟令試之侃執稍上馬左右擊刺

特盡其妙觀者登

帝曰此樹必爲侍中折矣俄而果

折因號其稍爲折

稍上又製武宴詩三十韻示侃侃

卽席應詔帝覽曰

聞仁者有勇今見勇者有仁可謂

鄒魯遺風英賢不絕是日召入直殿省後遷都官尙書
尙書令何敬容用事與之並省未嘗游造宦者張僧允
嘗候侃侃曰我牀非闔人所坐竟不前之時論美其貞
正大清元年大舉北侵以侃爲冠軍將軍監作寒山堰
事堰立侃勸元帥貞陽侯明乘水攻彭城不見納旣而
魏援大至侃頻言乘其遠來可擊不從侃乃率所部頓
堰上及衆軍敗結陣徐還二年十月侯景反帝問侃策
侃請以二千人急據采石令邵陵王襲取壽春使景進
不得前退失巢窟烏合之衆自然瓦解議者謂景未敢

便逼都遂寢其策景至新林令侃副宣城王都督城內諸軍事是時梁興四十九年臺內無事公卿在位及閭里士大夫莫見兵革賊至卒迫公私震駭時宿將已盡後進少年並出在外城中惟有侃及柳津韋黯津年老且病黯懦而無謀軍旅指揮並決於侃膽力俱壯簡文帝深仗之南史及賊逼城衆皆恟懼侃僞稱得射書云邵陵王西昌侯已至衆乃少安賊攻東掖門縱火甚盛侃令以水沃火火滅引弓射殺數人賊乃退加侍中軍師將軍有詔送金五千兩銀萬兩絹萬匹以賜戰士侃辭

不受部曲千餘人並私加賞賚賊爲尖頂木驢攻城矢石不能制侃作雉尾炬施鐵鏃以油灌之擲驢上焚之俄盡賊又東西起土山以臨城侃命爲地道潛引其土山不能立賊又作登城樓車高十餘丈臨射城內侃曰車高塹虛彼來必倒可臥而觀之不勞設備及車動果倒賊旣頻攻不捷乃築長圍朱异張綰議欲出擊之武帝問侃侃曰不可賊多日攻城不下故築長圍欲引城中降者耳今擊之出人若少不足破賊若多則一旦失利自相騰踐門隘橋小必大挫劬不從遂使千餘人出

戰未及交望風退走果以爭橋赴水死者大半初侃長子鷲爲景所獲執來城下示侃侃謂曰我傾宗報主猶恨不足豈復計此一子幸早殺之數日復持來侃謂鷲曰久以汝爲死猶在邪吾以身許國終不以爾而生進退因引弓射之賊感其忠義亦不之害也景遣傅士哲呼侃與語曰侯王遠來問訊天子何故閉距不納尙書宜啟朝廷侃曰侯將軍奔亡之後歸命國家重鎮方城懸相委寄何所患苦忽致稱兵今驅烏合之卒至王城之下虜馬飲淮矢集帝室豈有人臣而至於此吾荷國

厚恩當稟承廟算以掃大逆耳不能妄受浮說開門揖盜幸謝侯王早自爲所士哲無以應乃曰久挹風猷未獲披敘願去戎服得一相見侃爲之免胄士哲瞻望久之其爲北人所欽慕如此後大雨城中土山崩賊乘之垂入苦戰不能禁侃乃令多擲火爲火城以斷其路徐於裏築城賊不能進十二月邁疾卒年五十四詔給東園秘器布絹各五百匹錢三百萬贈侍中護軍將軍鼓吹一部

南史云
子球嗣

侃少而雄勇膂力絕人所用弓至十餘

石嘗於兗州堯廟蹋壁直上至五尋橫行得七跡泗橋

有數石人長八尺大十圍侃執以相擊悉皆破碎性寬厚有器局嘗南還至漣口置酒有客張孺才者醉於舡中失火延燒七十餘艘所燔金帛不可勝數侃聞之都下不掛意命酒不輟孺才慙懼自逃匿侃慰諭使還待之

如舊

梁書

論曰羊侃可謂忠於梁者矣太清之變事起倉卒侯景以百戰之餘必死之寇而梁直太平已久文恬武嬉援兵未集臨賀先降東府既殘南浦遇害臺城之破直漏刻間耳侃以疏逖之臣處危疑之地蒼黃受寄慷慨登

陣墨守輸攻機牙四應乃至棄子弗顧之死靡他史稱其志等松筠心均鐵石洵無恧焉夫梁武遇侃良厚而魏爲舊君待羊氏不薄顧忠於梁而叛於魏者何哉曰侃非叛魏也避爾朱也爾朱榮沈弒帝后斬薙侯王擁戴辱君盜移魁柄勢將盡翦拓跋之羽翼而落其爪牙若侃之世家才武榮畏且忌之久矣侃旣不能低首事榮又自度力不能討坐待屠割尤心有弗甘欲不挈家南奔將安之乎是時魏宗室諸王若北海王顥臨淮王彧汝南王悅均以避亂歸梁侃詎有異哉然則深敦輩

何以獲全曰此皆羊氏之恂恂儒雅者耳非侃比也非榮之所畏且忌者也

侃第三子鵬字子鵬隨侃臺內城陷竄於陽平侯景呼還待之甚厚及景敗鵬密圖之乃隨之東走景至松江戰復敗惟餘三舸下海欲向蒙山會景倦晝寢鵬語海師此中何處有蒙山汝但聽我處分遂直向京口至胡豆洲景覺大驚問岸上人云郭元建猶在廣陵景大喜將往依之鵬拔刀叱海師使向京口景欲赴水鵬抽刀砍之景乃走入舡中以小刀抉舡鵬以稍入刺殺之事

聞元帝以鷓爲明威將軍青州刺史封昌國縣公邑二千戶賜錢五百萬米五千石布絹各一千匹又領東陽太守征陸納加散騎常侍平峽中除西晉州刺史破郭

元建於東關遷使持節信武將軍東晉州刺史承聖三年西魏圍江陵鷓赴救不及從王僧愔征蕭鼓於嶺表聞太尉僧辨敗乃還爲侯瑱所破於豫章遇害時年二

十八

梁書南史王僧辨傳云僧辨弟僧愔位譙州刺史征蕭勃及聞兄死引軍還時吳州刺史羊亮隸

在僧愔下與僧愔不平密召侯瑱見禽僧愔以名義責瑱瑱乃委罪於將羊鷓斬之與梁書本傳異亮卽鴉仁

子也

羊鴉仁字孝穆泰山鉅平人也

與深侃同籍同姓世系無考

少驍果

有膽力仕郡爲主簿普通中率兄弟自魏歸梁封廣信

縣侯征伐青齊間累有功績稍遷員外散騎常侍歷陽

太守中大通四年爲譙州刺史大通七年除太子左衛

率出爲北司州刺史侯景降詔鴉仁督土州刺史桓和

之等率精兵三萬趨懸瓠應接景仍爲都督豫司淮冀

殷應西豫等七州諸軍事司豫二州刺史鎮懸瓠會侯

景敗於渦陽魏軍漸逼鴉仁恐糧不繼遂還北司頓軍

淮上景逆節漸萌鴉仁累有啟聞朱异不爲聞奏

見异傳

及景反鴉仁率所部入援太清二年景既敗盟鴉仁乃

與趙伯超及南康王會理共攻賊於東府城反為所敗

臺城陷鴉仁見景為景所留以為五兵尚書鴉仁常思

奮發謂所親曰吾以凡流受寵朝廷竟無報効以答重

恩社稷傾危身不能死偷生苟免以至於今若以此終

沒有餘憤因遂泣下見者傷焉三年出奔其故部曲數

百人迎之將赴江陵至東莞胡三省通鑑注云南徐州有東莞郡不在江西意者

東莞其東為故北徐州刺史荀伯道諸子所害梁書子亮

仕至吳州刺史南史

贊曰泰山羊氏世胄鉅平太傅而降鵠起諸英深實
修整烈亦純貞敦著治績追詔褒榮侃避爾朱江表
馳聲跛虜內犯誓死嬰城厥子克肖手斬長鯨鴉仁
思奮齋志堪矜

孟表傳

孟表字武達濟北蠡邱人也因事南渡仕齊爲馬頭太
守魏孝文帝太和十八年表據郡歸魏除輔國將軍南
兗州刺史領馬頭太守賜爵譙郡侯鎮渦陽齊遣豫州
刺史裴叔業攻圍六十餘日城中食盡惟以朽革及草

木皮葉爲糧表撫循將士戮力固守會魏鎮南將軍王
肅解義陽之圍還以救之叔業乃退初有一南人攜妻
息自壽春投表云姓邊字叔珍慕化歸北未及送關使
值叔業圍城表察其顏色有異卽加推覈乃是叔業所
遣規爲內應所攜妻子併亦假妄表出叔珍於北門外
斬之人情乃安高祖嘉其誠績封汝陽縣開國伯邑五
百戶後仕至平東將軍齊州刺史延昌四年卒年八十
一諡曰恭子崇襲爵累官昌黎濟北二郡太守

魏書

贊曰武達偏才倜儻負氣初仕南齊後歸北魏留鎮

馬頭完堞繕備叔業環攻盈城鼎沸軍無見糧空言
撫慰辨謀察奸當機奮智邊珍授首士有固志啟土
汶陽累世勳貴

明

王賢傳

王賢字惟善其先通州人元季避兵山東明初遂占籍

甯陽

世居邑北戴村

曾祖璿仕元僉樞密院事祖成虞城縣尹

父友直早失怙恃事兄甚謹郵鄰周急惟恐不及賢生
而岐嶷體態與恆兒異少長讀書潛心問學中永樂辛

卯舉人授鄆陵教諭學久廢弛賢至振厲作興以身爲

教嚴條約程課業不易寒暑又言於有司新學宮飭廟

祀煥然一新士咸知向學多所造就戶部尙書張睿字

通鄆陵人宣德庚戌進士禮部侍郎兼翰林學士薛瑄

天順中累官戶部尙書

字德温河津人父貞爲鄆陵教諭瑄補鄆陵學生永樂

十九年進士英宗復辟以禮部左侍郎兼翰林學士入

閣預機務卒諡皆其高弟子也秩滿擢戶科給事中明

文清從祀孔廟

優禮師儒教官擢給封駁章奏屢稱上意舊志引水東

事御史見選舉志

人王賢少遇異人相之當官三品乃授以青囊書遂精

其術永樂七年成祖卜壽陵有司以賢應命於昌平東

北十八里選得吉壤舊名東榨子山陵成封曰天壽賢

後累官至順天府尹兩京耆舊錄天壽山陵擇地或云

人物

江西廖均卿或云山東王賢賢字惟善中永樂辛卯鄉試以鄆陵訓導擢戶科給事中陞光祿寺少卿尋遷順天府尹王鏊震澤紀聞王府尹忘其名嘗夢人授之書曰讀此可衣緋不讀此止衣綠覺而異之數日於路得一書乃青烏家說也玩讀久之以善地理聞為鈞州佐時漢府遣人購之辭曰吾非詔旨不往漢以名聞時太宗有事壽陵乃召見於房山上指示其處對曰此公侯地耳扈從至竇家莊蓋竇十郎故址曰勢如萬馬自天而下真龍穴也乃定即今壽陵前有小阜欲去之曰恐妨皇嗣上問無後乎曰非也但多庶出耳曰庶出亦可也遂不去

進光祿寺少卿奉敕淮陽巡視民瘼著後累世皆驗

廉幹聲上知其才擢順天府尹

賢擢府尹應在宣德正統間舊傳未詳遂無可

考輦轂之下兵民雜處權勢縱橫賢不剛不柔爬奸剔

蠹一處以公言動尊嚴人不敢以非禮干吏民大化之

嘗以柴炭爲民病語工部石尙書

明史石璞傳正統三年爲工部尙書此

尙書必璞也

曰京民勞疲極矣今採運夫役與直保諸郡等

無乃不可乎石默然爲遞減之惜薪中貴

明置惜薪司主上用柴炭

非法陵府屬叱跪於庭熾火圍之賢聞趨至縛其人將

言於上主者溫言謝乃釋去一日坐公堂有懸金牌直

入稱權勢官索板席若干賢曰明日來取察知其詐比

至執之置於法其處事多類此九載滿表乞致仕不許

陞正二品俸復任又三載再疏乞骸骨上曰卿年七十

禮當致仕然京畿冗繁非卿莫治所請不允英宗復辟

之初顧謂近臣曰府尹如賢者何可得哉至是賢七十有三上章引疾力辭得請卽日上道士民攀轅塞塗戀戀不忍舍去賢在任嘗修治學校及宋文丞相祠事集而民不擾苟有可省卽省之惟恐累民故民德之深如

此按正統景泰間也先南犯京師兩次戒嚴賢應有守城功仕內外四十年所至以

謹慎稱非義一毫不取宅心忠恕待人不設勾絞故人佩其德而欽服焉自休官歸里居十年不以勢利關懷恆與致仕翰林學士許彬優游於山岨水曲之間吟風弄月澹如也成化改元用恩例進階一級授中奉大夫

三年五月三日卒年八十三卒之日邑人無老少皆奔走哭焉子大經大綱大業大綸大經字禮之與大綱同舉於鄉除工部司務累遷兵部員外郎設施悉遵家訓時論賢之大綱字振之知江都縣稱廉平改知徐清縣能化強悍遷判鳳陽府以母老告歸大業以廕補官爲臨穎主簿大綸穎秀力學早負令譽年十八遽卒士林悼惜會孫應珍裔孫正容並自有傳

正容見良吏應珍見耆德舊志賢傳

殊嫌漏略別爲大經大綱立二小傳列之良吏亦與史法不合今依獻徵錄增補賢傳而以四子附後

贊曰有斐京兆鶴舉鴻鸞一振木鐸弟子多賢帝嘉

乃績門下用遷漸躋卿貳出按淮壩爰立作尹畿甸
旬宣恩不廢法道以行權威懾中貴澤流百廛晚賦
遂初全節歸田

許彬傳

許彬字道中其上世隸碭山縣祖成元季避兵始遷甯

陽初居靈山之麓東後移縣城成志行方鯁鄉里尊信

有司辟爲忠直老人給告身焉父仲德克世厥家隱德
弗耀彬少以文學與王賢齊名登永樂乙未進士改翰
林院庶吉士尋授檢討宣德中秩滿陞修撰與修仁宣

二廟實錄正統丁卯出典福建鄉試號稱得人以上據忠直君

碑獻徵錄 十四年大學士曹鼐甯晉人土木薦提督四

譯館時貢市紛紜也先諸部漸形桀黠彬洞悉事機曉

解譯語為朝論所推會遭父喪特詔起復累乞終制弗

許彬墓 九月陞大理寺少卿十月轉太常寺少卿舊志

徵錄皆云轉太常寺卿按明史彬傳但稱累遷太常兼

翰林待詔明史景泰元年英宗北還議遣大臣迎駕彬毅

然請行曰主辱臣死分也八月也先遣知院等以五百

騎送英宗至宣府彬謁見舊志云凡三往返迎駕而歸蓋據彬墓碑但與明史及獻

徵錄俱不合故不錄 明史紀事本末景泰元年也先欲和恥屈意陰使阿刺等來言於是禮部會議請遣太常少卿許彬錦衣都指揮馬政譯來使情偽 英宗命書彬等言也先果欲議和罷兵且奉還上皇

罪已詔敕論文武百官仍遣彬祭土木陣亡官軍以此

受知

獻徵錄

回京擢本寺卿天順元年正月英宗復位進

禮部左侍郎兼翰林學士入直文淵閣

明史 獻徵錄 云張軌等主復

辟以謀叩彬彬曰此社稷功也雖然彬老矣無能為矣蓋圖之徐元玉明史彙述彬言曰此不世功也彬老矣無能為徐元玉善奇策盡與圖之按明史之修因乎史彙史彙之作實採之獻徵錄今按獻徵錄云此社稷功自因是時景帝大漸皇儲未立故欲迎復英宗以安社稷乃史彙改社稷曰不世又云徐元玉善奇策則是視英宗為奇貨而欲藉為富貴之資史家以一字殺人真可畏哉辨具後論 雙槐歲鈔天順改元復王振官壘

像於振所作智化寺北祠之賜額曰旌忠僧然勝奉其
香火夤緣以孝行被旌學士許彬積不平賦詩曰忠臣
偶爾陷車駕孝子胡然傷髮膚智彬性坦率好交游明
化寺中祠屋上薊門風峻夜啼烏

及參機務一意閉門謝客

獻徵錄

翰誠秉公侯伯中有以

迎復爲功而陞秩不愜意者再三言於政府彬戟手言

之曰爾戮得幾人何功其人慚而退每爲英宗言陛下

當棄過錄才如王竑宋傑陳泰

舊志誤作曹太
今據彬墓碑改

商輅王

偉才皆可用不宜置之散地昔唐太宗不罪王珪魏徵

反錄用之卒成貞觀之治此前代明驗也石亨恃功驕

恣權傾中外當如宋太祖杯酒釋藩鎮之權俾獲老死

曠下今寵之太過恐非保全之道英宗心善其言而未

欲顯露亨聞恨甚乃內結權璫曹吉祥共擠之舊志一日

朝退上東閣階峻雪滑彬失跌傾仆匍匐復上徐有貞

俛首側項嚟然而笑會岳正入相英宗乃謂正曰凡事

為朕主張許彬老矣不足恃矣石亨憾彬不已七月請

南京禮部右侍郎獻徵錄明中道復左遷陝西參政

舊志云以事繫獄今考明史獻徵錄及彬墓碑皆無此事故不書遂乞骸骨致仕舊志五

年石亨敗乃復其官卒獻徵錄年七十六贈禮部尚書諡

襄敏彬器量宏遠學問醇正所著有東魯先生文集十

卷詩四卷

明史藝文志 王漁洋北征日記鄉先輩許襄敏公贈岳蒙泉詩有云道上鉤衣蒼耳子

風前聒客白頭翁公詩世不多見此殊可誦

子超舉人起進士高第俱未仕

卒

論曰舊志於彬傳後附書云

此上屆修志時所書也

本傳所載迎

復事與明史不同

所謂明史乃史藁也

姑仍之以俟考此殆未即

彬立朝本末及當日情事一一確究宜其疑而莫決也

夫彬固忠於英宗而不預奪門之事者也英宗北狩明

之大變也迨景帝既立而也先悔禍忽欲送還此非景

帝所樂聞也故王直等議遣使奉迎帝即不悅並云朕

本不欲登大位當日見推實出卿等賴于謙以天位已定詎復有他迎機勸導於是奉迎之議始定當時在廷諸臣知有景帝不知有英宗久矣彬浮沈館閣二十餘年僅得一太常冷官非有逼處之地莫諉之責也乃獨引主辱臣死之分慷慨請行豈逆料英宗必能歸國歸後必且復辟而妄希後福哉情切於舊君而罔恤其他也迨宣府上謁下詔罪己弔死問存義動朝野蓋皆彬有以啟之然益非景帝所樂聞也不集於苑而集於枯彬之愚弗可及已爲英宗者浹歲蒙塵一朝旋蹕愴懷

今昔觸目悲涼迴憶正統舊臣此時殆未有如彬者洎
國門朝入南宮夕閉玉階草沒龍蟄八年其心何嘗一
日忘彬哉故當復辟之初遽有綸扉之命非以賞奪門
正以酬迎駕也且夫奪門之謀乃石亨曹吉祥輩乘機
擁戴以倖恩澤耳非忠於英宗也徐有貞以險譎之姿
兼占候之術武夫闇人心折已久故引與共事而聽其
指揮若彬者文學侍從之臣耳非有奇才異能竦動當
世且以垂白殘年胸襟廓落乃亨等所不取也天下詎
有廢立大事昏夜密謀輒向迂疎衰老坦率之人無端

輕洩者哉且使彬果曾與謀則入閣後必與亨等相爲表裏共保身名何以曾不踰年旣爲有貞所笑復爲亨與吉祥所擠鑠金銷骨主眷潛移一貶留都再謫關隴卒至屏息縮項放廢歸田抑獨何哉然則明史橐及獻徵錄胡爲有所云云也史稱彬入閣後杜門謝客舊交競相騰謗此必因其進用之驟而詆其與徐石之謀以厚誣之否則亨輩造爲此言以動英宗而搆彬也若曰臣等初以迎復之謀叩彬彬曰老矣無能爲矣此尤非英宗所樂聞也觀於彬升閣失足爲有貞笑英宗亦謂

岳正曰許彬老矣不足恃矣何其與史所稱彬之對張軌者如出一口也此必有先入之言矣嗚呼讒臣造爲風影之談巧中人主而傾其所忌獨亨輩之於彬也歟

附考

明史英宗後紀天順元年春正月壬午昧爽武清侯石亨都督張軌張軌左都御史楊善副都御史徐有貞太監曹吉祥以兵迎帝於南宮御奉天門朝百官徐有貞以原官兼翰林學士入閣預機務日中御奉天殿卽位太常寺卿許彬大理寺卿薛瑄爲禮部侍郎兼翰林學

士入閣預機務

翰林記於徐有貞入閣參預機務下書曰以迎復功故有是命於彬止書是日

太常寺卿許彬為禮部左侍郎兼學士與有貞同視事而已

丙戌論奪門迎復功封

石亨忠國公張軫太平侯張輓文安伯楊善興濟伯曹

吉祥嗣子欽都督同知

後徐有貞亦封武功伯

於壬午書迎復諸

臣而不及彬於丙戌書封賞諸臣而不及彬書御門朝

百官徐有貞即以原官入閣而彬不與同拜迨即位後

與彬同進春官入參大政者乃立朝中正素與徐石輩

薰蕕異氣之薛夫子也彬之為人亦略可想見矣

李文達玉

堂賞花記文淵閣右種芍藥有臺相傳宣廟幸閣時命工砌者初植一本居中澹紅者是也景泰初增植二本

純白居左深紅居右舊常有花自培植後未嘗一開天
順改元徐有貞許彬薛瑄李賢同時入爲學士居中一
本遂開四花
人以爲兆
再明史彙附彬及陳汝言於徐有貞傳中
誣之已甚迨

小純皇帝欽定明史始爲彬別立傳列諸江淵之後而有貞
傳自與楊善並列蓋鑒及於彬之被誣故顯示區別也
豈不炳若日星昭昭信史也哉

贊曰許氏發祥靈山之東篤生學士如鳳斯翬發爲
文章其光熊熊早陟玉堂斧藻天工土木遘難六飛
塵蒙要請迎駕孰測敵衷主辱臣死甘委旃穹主歸

國福臣不言功奪門何事自有諸公暫膺調鼎旋慨
藏弓

二吳傳

吳孟祺字元壽

居邑城西南巷

父偉字朝英博學工詩正德中

由歲貢爲巴陵訓導本身立教動循規則遷館陶王府
教授以王富於春秋畜德宜豫至則奏記勸王講學親
賢恪奉藩職王改容嘉納居家孝友美田宅悉以讓異
母弟而自稱貸僦屋以居士大夫稱爲今薛包室間書
一聯云晝有爲時隨夜告己無欺處對人言其操行類

如此舊志爲偉別立小傳入師範今依史例移冠孟祺傳前孟祺幼稟庭誥性耿

介篤志力學爲文剷去浮華獨標精理中嘉靖戊子舉人魁其經房主司目爲百鳥中孤鳳八年己丑成進士釋褐知江南五河縣地本衝疲關吏肆虐爲商旅害孟祺廉悉其貪橫狀乃力請上憲罷關稅並置巨猾六人於法恩威大著邑多湖瀨實盜藪也操舟拔櫂伺間剽斂風濤出沒吏莫能詰孟祺曰殪妖鳥者先傾其巢吾知所以治之矣乃託言水利大集丁夫導湖下流悉注之河不數日水涸盜盡徙擒斬其渠魁數人餘皆股慄

不敢動四境以安於是即其地建書院收湖田租息以資膏火延山長聚生徒政事稍暇每躬自督課文風漸起巡撫劉公錄其政績榜行所屬為諸縣法以才調繁

知河南洛陽縣治如五河益著聲績考績入覲內遷刑

部主事外戚張延齡以謀逆繫獄事無左驗因帝銜張

氏舉朝莫敢申白孟祺廉知其冤殺然平反忤上意廷

杖謫降直隸祁州同知

張延齡孝宗張后弟也世宗入繼大統張后改稱皇伯母帝因

張后擲其本生母興國太后故銜張氏嘉靖十三年董至告延齡謀逆下刑部逮治延齡嘗買沒官第宅造園池踰制又以私憾殺婢及僧事併發覺刑部以延齡謀逆無驗而違制及殺人皆實帝猶謂尚書聶賢故輕之

奪其俸延齡遂論死繫獄事具明史外
戚傳孟祺廷杖謫官必此時此事也
大吏委均賦役

鉤考詳實劑量平審惟務藏富於民勿輕報富於官百
姓翕然德之秩滿當遷州人詣闕上書乞留遂擢知本
州轉南京戶部員外郎尋陞郎中所在稱職外遷知陝
西西安府嘗以八字自箴曰不貪不酷不諂不傲居心
行政一以李文靖節愛爲宗額其堂曰節愛有節愛堂
題詞三百十五言載西安府署吳公去思碑潼關爲全
陝咽喉地連三省巨盜芽蘖動成滋蔓撫按題請復設
兵備專官以資控扼世宗特敕孟祺以按察司副使駐

劄其地提調陝西之白水華州等十州縣河南之閩鄉靈寶二縣山西之蒲州及各關衛官軍孟祺嚴紀律明賞罰勤訓練一切把截關隘剿捕盜賊修濬城池禁革奸弊靡不殫心竭力處置得宜在任數載盜息民安治行爲秦中最會世宗倦勤嚴高竊柄綱紀日弛孟祺愀然曰埋輪無自狐狸何多問爲由是絕意仕進年不滿五十卽謝政東歸優游林下二十餘載惟杜門著書課子非公事不見邑宰介節懍如也隆慶二年七月十六日卒年七十一所著有義命箴規拙修邇言六泉漫稿

警庵文集等書藏於家崇祀五河名宦本邑鄉賢弟二

人孟祿自有傳見孝友孟雄歲貢開封府教授子崇質贈

文林郎孫以諒自有傳見良吏

吳崇禮字彬卿居邑城西街道東孫道東見篤行少穎異年十四

補邑諸生縣令秦公吉士一見卽以公輔期之萬曆十

四年丙戌成進士釋褐知山西蒲縣時值荒旱頻仍甫

下車問民疾苦首請蠲賑給牛種招流宄逃困頓蘇以

才調繁知臨晉縣軍民雜處號稱難治尤喜健訟崇禮

寬猛並施四境帖服縣北多山民苦乏水捐俸鑿井汲

者便之二十年行取御史入覲時東省大饑道殣相望

崇禮乃上疏曰去歲霖雨山東河南淮徐等處地方數

千里橫罹水災夏麥秋穀均無收穫兗與河南徐淮接

壤故其被災甚酷與徐淮河南無異徐淮留米十五萬

河南留銀米共約十餘萬議者猶謂不足乃山東四府

止留折漕銀二萬備倭米豆三萬東省之災非減於徐

淮河南也而賑之多寡懸絕已甚皇上覽流民圖說從

科臣楊東明之請特發戶工二部錢糧命寺臣鍾化民

領敕往河南賑濟

明史神宗紀十九

年賑河南饑卽此而澤尙靳於東土

之民豈流徙死亡未至若中州甚歟臣昨由山東入京
時目覩百姓流離載道自南而北絡繹不絕憔悴枯槁
無復人形沿途鬻妻賣子壯年之婦止易斗粟十歲之
男僅易數錢棄嬰孫於溝渠拋垂白於中路餓殍枕藉
盜賊公行路人相食一切不忍見之景象大都與東明
所陳者相同自古禍亂之興未有不始於失民心者山
東密邇畿輔爲第一藩屏今雖饑餓切身然猶朝夕延
頸以覬恩澤忍死而不敢爲亂萬一人心渙散奸雄之
徒乘機鼓煽嘯聚猖狂竊弄鋤梃於潢池中彼時豈能

為帑藏之乏置而不問乎勢必議撫議剿無論所費不
 貲然驅良民而為盜陷赤子而入於刑皇上愛民如子
 之本心恐亦大有所不忍者可不急救而預防之乞亟
 發帑金十萬及時以賑山東庶嗷嗷待哺者不盡為溝
 中之鬼而洶洶不靖者亦可以消未萌之奸

舊志列此疏於藝文

非也此乃立朝建白不關本邑今補入本傳

疏入上允發帑金五萬賑之多

所全活出按兩淮鹽政疏壅剔蠹積羨歸公分毫無染
 趙鳳威者首揆志臬子也為兩淮運副崇禮彈劾無所
 避時稱其公

明史趙志臬傳志臬於二十三
 年為首揆崇禮按鹽亦在此時尋以外艱

歸在二十四年哀毀逾恆制服闋起補原官二十八年按淮

揚時值河淮泛漲祖陵震恐

萬曆三年高家堰決黃水躡淮逼鳳泗十九年淮水

溢泗州後又東決高良澗灌泗陵帝怒奪總河舒應龍官用楊一魁代之復命給事中張企程往勘設法疏導

淮水漸平崇禮按淮在企程後數年蓋是時河淮復漲

明史河渠志江北巡按吳崇禮請自蒙牆寺西北黃

河灣曲之所開濬直河引水東流且濬李吉口至堅城集淤道三十餘里而盡塞黃堦以南決口使河流盡歸

正漕工部尙書楊一魁崇禮以河漕事權不一每患旁以崇禮之議為正策

撓疏請河務專責河臣漕務專責撫臣繇是河漕兩利

而鳳陽無水患二十九年改按兩浙三十三年巡關閱

兵並著聲績三十五年廷推閣臣禮部尙書李廷機入

相九列皆具保疏崇禮不可曰臺臣職司參駁不聞有

保舉也

舊志云晉江拜相臺臣九列皆具保疏崇禮獨毅然不可曰吾臺省有參駁不聞有保舉也未

幾保者皆斥

按晉江乃禮部尚書李廷機其人相正在萬曆三十五年丁未崇禮之晉大理亦在此年是時

廷推閣臣九列例具保疏而廷機素為言路所嫉攻之

者不下數十人卒至不安其位不得云崇禮獨毅然不

可也諸御史有因攻之而奪俸者未聞

是年改大理寺

有因保之而被斥者與明史皆不合

右寺丞旋晉右少卿執法明允多所平反上知其才堪

方面遂於四十年

是年壬子舊志作丁未誤考崇禮撫薊奏略有交代疏於萬曆四十年三

月初四擢右副都御史順天巡撫

明順天巡撫轄順天永平二府兼整飭薊

日接印

州等處

邊備 謹斥埃繕甲械簡卒教戰常若臨敵而持以鎮

靜戒將士勿生事開釁邊氓以安內使李朝用酷刑致

斃平民楊現珠託爲徵比希圖脫罪大璫陰左右之崇

禮抗疏糾彈乞付法司究問卒雪其冤四十三年以兵

部右侍郎移督宣大尋晉尙書總督如故

明初設宣大巡撫又設三

邊總制嘉靖十九年定制總督宣大山西等處軍務兼理糧餉是時套部順義王卜石

圖初襲封爵權力不足制諸部虎墩圖者元裔也居察

漢兒地

卽今之察哈爾

亦竊察漢兒王子勢寢盛套部遂與之

合狼狽相倚數爲邊患要求封賞崇禮申明約束宣布

恩威以大義折狡謀而時出機權制其變會套部猛克

什力等犯延綏邊乃檄總兵杜文煥以精兵遮擊連戰

皆捷

明史杜文煥傳

於是火落赤擺言太吉能切盡歹青沙討

等東西諸部莫不震讐先後來請貢市奉命惟謹

明史外國

傳

在鎮數年盡革曩時溢額之請歲省金帛無算四十

八年以繼母艱歸銜悲泣血年近七十而孺慕不衰也

天啟二年白蓮妖賊徐鴻儒作亂陷鄆城犯滋陽連破

鄒滕游騎四出鄉邑戒嚴崇禮方讀禮家居出貲募士

協同地方有司率衆登陴相機防禦賊不敢窺比閭恃

以無恐復移書巡撫趙彥言舊部曲楊肇基久將習兵

才足辦賊彥乃悉以兵事委肇基遂平寇難禽鴻儒等

十八人悉伏誅不數月山東平崇禮與有力焉

鴻儒於
是年五

月作亂十五年以宿望起兵部尚書時

大兵已破旅順

在是年
二月

東事方棘崇禮被命星夜趨朝

大璫魏忠賢方竊柄銜崇禮素不附己乃以中旨罷之

而用其私人王永光

按明史七卿年表是年兵部凡三
易尚書趙彥五月致仕以高第代

第十月經略遼東以王永光代崇禮之起家晉中樞當

在高第後蓋是時東事方棘第出視師而崇禮功在兩
鎮故有是推忠賢惡其不附且意注永光故以中旨罷
崇禮而永光以南兵部改北也永光附闖具詳明史

旋改南京刑部尚書抵任值熱審親檢冊籍不辭炎暑

積勞成疾於六年八月二十七日卒官年七十有四訃聞贈太子太保諡定襄崇禎初忠賢誅復以功在兩鎮不黨逆闕敕建專祠春秋致祭廕一子入監讀書復廕嫡孫錦衣衛指揮蓋異數也崇禮氣貌溫和襟宇沖曠與人交若谿若谷無所不涵茹而其中介然有以自守居家儉素既貴田產不加疇昔被服若儒生至義所當爲則傾囊無所吝生平著述甚富多因兵火散失有三邊總圖若干帙撫薊奏略若干卷藏於家二子以詢以誨以詢字師虞由生員以廕補官歷判嘉興溫州二府

入爲光祿寺署正累擢南京刑部郎中恪守先型所在

稱職以誨戶部員外郎孫應泰由廩生恩廕錦衣衛指

揮使明亡殉節

舊志崇禮傳於其爲宣大總督漏未敘及於其爲順天巡撫則繫之於三十五

年丁未是崇禮甫晉理卿旋擢巡撫矣於其丁繼母艱則繫之於三十六年戊申是崇禮撫薊僅一年卽以憂去官矣按崇禮卒於天啟六年丙寅年七十有四則萬曆三十六年戊申年方五十有六乃又云六十而慕不衰其誤明甚且崇禮果於是年憂歸至天啟乙丑方以兵部尚書起用則家居計十八年之久豈有朝廷概置不問無端超晉中樞之理以邑人爲鄉賢立傳而舛錯若此殊不可解今悉依崇禮墓碑及家乘改正

贊曰吳本華胄世有令聞篤生副使抱質披文循良

奏最平反著勳杖謫弗避將以悟君帝鑒無佗嚮用

日殷一剖郡符治絲不棼備兵關陝用清盜氛青辭
日進丹辰倦勤見幾早作歸釣沈濱堂堂尚書廊廟
之珍神羊初奮首繪流民帑金東發桑梓歸仁歷按
淮淝恩普代巡爰晉鳩卿載撫鳳闈遂總三邊旃裘
漸馴環畿有謐市塞無塵起長樞部帝簡方新大璫
蒙蔽遽輟温綸陪都欽恤星墜江雲

國朝

周爰訪傳

周爰訪字成延

居邑東南
韋週村

紹業子

紹業見
良吏

紹業僉判松

江府督餉北輸中途病卒是時爰訪方七歲聞訃號慟

哀感行路稍長稟質岐嶷性尤醇篤兄爰誨潛心力學

爰訪事之如師奉教惟謹事母色養備至與兄並以孝

聞未冠補邑諸生歲科試累冠其曹文譽籍甚崇禎中

吏部議通行直省物色懷才抱德經明行修之士邑令

劉公芳大欲以爰訪薦意弗屑也乃遺書力辭書見芳

大高其志竟弗能屈明史選舉志云洪永以降科舉日

重薦舉日輕人情亦共厭薄爰訪

之力辭蓋有由也但崇禎求賢之議實在九年而舊志
職官門芳大爲令在五六七八年間其中必有舛錯
旋舉己卯鄉試十六年癸未成進士觀政吏部未及授

職假歸明社旋屋

皇朝定鼎網羅遺佚爰訪於順治初以徵梓北上入都選授

翰林直內宏文院一時

制詔咸與屬橐乙

舊志誤作己

酉分校京闈丙戌典試二楚甄摘精

審所拔悉知名寒俊士論翕然事竣還京擢編修以疾

卒官聞者莫不歎惜爰訪儀度端凝偉軀幹美髭髯丰

采如玉山映人工詩古文詞書法適逸在衡山伯仲間

學者得其片楮珍若拱璧邑人請祀鄉賢子仔世治世

仔世字克任增貢生爰訪卒官仔世年甫十四徒眺于

里扶輿歸長精醫術活人無算會歲饑有鬻妻養母者
夫妻泣訣於塗仔世立出貲完聚之工書有父風所著
甯邑喪禮辨略傳於世治世歲貢生與兄事母併以孝
聞後爲利津訓導課士有程號爲稱職卒並祀鄉賢

贊曰玉堂天上邈矣難求甯山千載前許後周成延
玉潤品越琳瑯生遭末季厥志未酬

興朝籲俊川納網收木天高步玉尺旁搜天不假年叢桂

周秋

甯之鳳傳

甯之鳳字德九

居邑城東街

允濟子

允濟見文學

天姿穎悟父授

以經輒通大義為文出語驚塾師年十七補邑諸生舉

崇禎丙子鄉試我

朝順治三年丙戌首開制科成進士授工部都水清吏司

主事之鳳資性剛介偉貌修髯具文武才長官深倚重

之積資陞虞衡司員外郎河決呂梁奉使往治疏壅防

潰用節而事集不期年歲事還京奏對稱

旨累陞營繕司郎中時方修造

慈甯宮殿工鉅費繁

世祖知之鳳才可任命充監督工竣省帑金數萬悉以歸公奏

上

世祖嘉悅記姓名於殿柱賜白金貂裘御騶以旌其廉尋出知

河南府正己率屬人不敢干以私中州承明季兵燹之後千里墟莽十室九空之鳳招集流宄噢咻撫摩民氣頓蘇惟時流寇餘孽往往倚險屯聚伺間剽掠時時出沒關陝間至是乃密遣間謀潛通城內奸民叛卒約爲內應期以十年正月十六日夜半攻城有兵婦知其謀卽於是夕詣府告變之鳳以事急同城僚屬無可與謀

者稍遲則事洩而賊驚逸若待其至而與之決是焦爛也且勝負未可必獨念是日爲上元次夕莫若以計出城於城外殲之乃叱兵婦使退陽爲不疑而密選壯丁五百人各以輕裝衷甲懷刃多攜花爆託爲民間煙火之戲次第出城潛伏壕側夜半賊果大至之鳳出不意躍馬直前殺賊伏兵各評謀而起賊大驚自相騰踐官兵乘之斬首三百有奇餘衆悉遁之鳳入城乃掩捕奸民叛卒之爲內應者誅首惡數人餘皆不問反側以安事平論功陞關內道副使部內屬羌有疑獄久不決之

鳳至廉其情偽一訊卽服再遷金衢嚴道參政

參政者布政司

參政也秩從三品

國

浙東山川阻深舊多伏莽鯨鯢

初沿明制今悉改道員

出沒擇肥而噬之鳳督造戰艦指授方略擣穴掃巢擒

渠散黨在任彌年民不患盜擢陝西按察使廉察屬吏

激濁揚清貪吏望風解組尋以白蓮餘匪跳梁滋擾督

兵剿捕關隴悉定考績晉本省右布政使

國初沿明制設左右布

政使康熙

六年裁併

乃進三政吏而教之曰三秦懼兵革久矣初時

白骨蔽野鮮有了遺我

朝撥亂反治民慶更生而逃散新集饑寒在所不免親民

者當以撫字凋殘培養元氣爲亟慎毋急催科重因此
民爲也繇是郡縣悉遵約束務崇寬簡不敢爲苛暴數
年田野日闢戶口益增民使其政屬有疾陳乞罷歸先
是甯陽歲辦蠶柳十八萬筋以佐河工吏因爲奸重爲
民累之鳳白諸當官立予裁停桑梓咸霑其惠里居荆
扉草堂僅蔽風雨棕鞵箬笠時時爲汗漫游見者不知
其方伯也尋卒邑人請祀鄉賢

贊曰齊戚衛俞厥宗惟甯自唐以還爲甯著姓方伯
誕生實兼文行筮仕水曹冰心雪映河防衛民殿工

契

聖領郡參藩勳勞轉盛晉擢承宣代

天行政倦念殘黎如醫久病蠲棄煩苛務崇清靜惠普三秦甘

棠致詠

朱克配傳

朱克配字堯天

居邑北堽城屯

本儒家子少讀書通大義姿貌

雄異膂力絕人天啟中明政不綱流寇日熾徵兵加餉

所在繹騷克配慨然曰天下行且亂丈夫不能死邊疆

爲國殺賊亦當早爲家族鄉閭計徒搦三寸枯竹擁數

十殘冊何爲者耶乃學孫吳兵法得其肯綮又習騎射

刀槊下及拳勇技擊莫不曲盡要妙暇日餘力乃稍稍

攻舉子業年二十七始補邑諸生意思弗屑也崇禎末歲

稔民殍土盜芽孽乘機四起克配所居北距汶不十里

界甯陽泰安間兩邑固多山悉成盜藪甯陽之賊距東

南諸山而寨者曰秦景曰馬良曰蔡慙

俗稱蔡乃慙致

各糾衆

自稱寨主而泰安諸山賊亦遙爲響應官吏閉門自保

懼弗敢詰漸至蔓延數百里內所在蠶午橫行剽斂民

不聊生鄉人乃相與謀共推克配爲約長結土兵捍賊

克配謝曰此大事余書生恐無以慰諸父老請別擇能者鄉人固請不已則曰今以三事與諸父老約能從我乎衆曰願受教克配曰各計爾田以輸糧各計爾口以輸丁匿者按軍法可乎衆曰惟命又曰校閱有定期操習有定器坐作有定式惰者按軍法可乎衆曰惟命又曰賊未至不得訛言相驚賊既至不得張皇失措戰有前無卻守至死不移違者按軍法可乎衆曰惟命遂大合里中少年子弟得數百人擇曰椎牛饗士酒醕克配乃言曰今日以前朱克配之於父老子弟也以後則土

兵之於約長也賊旦夕至號令不一何以統衆行師衆皆曰惟命於是東部伍繕甲械勤教練嚴紀律不數月子弟悉成勅兵十三年秦安賊掠汶南克配禦之石梁口賊兩翼而進勢甚張衆色懼克配曰賊衆而囂無能爲也且彼未當大敵初與我遇不之識其將可取也乃令衆軍爲方陣勿動而自持渾鐵鎗單騎馳之所向披靡有華衣大冠乘馬者賊渠也方指揮卒不虞克配直前剗之洞胸墮馬羣賊亂衆乘之斫數十百人生擒百餘人馘而縱之由是汶北諸賊不敢復南渡當事諸大

吏亦自是聞克配勇且賢其兵精可用餽以牢醴待爲
上賓欲倚以辦賊無論本境鄰封凡寇盜披猖力難剿

捕者悉以委之並假以便宜行事克配故驍勇有幹略
信賞必罰與士卒同甘苦禽賊後奪回無主粟帛悉散
之部曲不少私故士樂爲用旣奉官捕盜乃益治兵而

是時甯陽諸賊衆莫若馬良秦景悍莫若蔡憨馬良者
故與秦景合結寨彩山之陽饑民蟻附不下數千人時

時出掠近山村墟咸罹其害獨畏克配及韓芝芳兵

芝芳

自有不敢越周村地名在而西克配以二寇不殄後且

遺大患乃爲擣巢計偵知良率衆東掠留景守寨遂密以其兵合芝芳兵先令芝芳以數百人繞越彩山東設伏待良自率親軍百餘人由山西夜覓樵徑銜枚疾趨夜半抵寨賊未覺克配督兵拔寨入於臥內斬景賊大譁一時驚潰遂火其寨質明東迎芝芳兵時良已飽掠歸伏發輒與芝芳戰未決克配馳至大呼曰吾朱堯天也已斬秦景火汝山寨汝馬賊將安逃邪良軍亂遂併斬良駐兵搜獲黨目數十人悉誅之蔡愨聞之大懼累月不敢出久之乃謀掠葛石店村

在筆架山南

村人求救克

配以兵赴之葛石店者副使張登雲故里也有樓高且
固賊至村人登樓拒守賊環攻未拔克配至賊驚曰朱
將軍來矣遂大奔克配追之至采石口憇謂克配曰將
軍休矣入我口中恐與軍不利克配曰旣至采石吾將
削菜采菜蔡土音並同卽直前斬憇降其餘衆克配旣翦二寇
諸賊憚其威望風瓦解東抵龜蒙南控鄒嶧毀巢蕩穴
所至成功數百里間倚爲保障當是時克配名震山東
會明亡

皇朝定鼎豫王南征江表以巡撫方大猷薦檄召從軍至邳

州單騎造城下曉以禍福官民開門迎降垂橐以入兵不血刃王大悅令攝知本州喪亂之餘流亡接踵克配還定安集與民更始在州三月德威並著治聲大起大吏交章論薦擢授州同知赴部注銓邳人號呼遮留聲振林野順治四年除六安州同知尋攝理英山霍山二縣沿江素稱多盜時鼎革方新奸民所在屯結負嵎不下克配且剿且撫連破一百餘柵境內肅清寇平旋任遂移疾歸數年卒於家卒後數十年邳及六安英霍人之以禱泰山來北者過甯上冢猶羅拜獻歔泣數行下

也其遺愛如此邑人請祀鄉賢

論曰朱克配之有功於桑梓也大矣哉甯陽彈丸僻壤無山河阨塞之固又非若南北衝要爲用兵所必爭其地旣瘠且貧巨盜神奸亦相與委棄之弗顧所可慮者土寇竊發耳明季流寇半天下土寇乘之蝟毛而起是時官兵以全力不能禦流寇更無餘力以治土寇而地方文武權輕力單羅雀鼠則有餘殪豺狼則不足是以馬良秦景蔡愍之徒結黨橫行而無所忌使非有如克配其人者爲之攘剔芟刈一時耨鋤襁褓之氓孱兒弱

婦被其蹂躪者尙有子遺哉嗟我邑人所以保家族長
子孫緜延似續以至於今得享二百年太平之福者其
初皆克配捍衛之力居多也余聞諸父老所傳克配平
賊之事甚夥往往近怪如夢漢壽亭侯傳授
刀法及用飛刀之類而舊志本
傳殊嫌陋略不足表先賢英槩於萬一故摭其大且著
者撰爲此篇俾後有述焉

贊曰明失其鹿氛塵四擾茲實一隅寇生如草初掠
村塢漸窺城堡彪彪朱公志不在小練卒出攻連鄉
入保首斷妖蛇巢傾惡鳥再造汶南立功江表

劉虎傳

劉虎字輔臣

居邑西胡村

自上世以武勇顯名鄉郡父國寶

夢虎入室旣而生虎因以名焉童時嬉戲里中好以己意部勒羣兒作戰鬪狀悉成行列偶憤怒叱咤衆皆辟易及長姿貌雄傑身長八尺四寸膂力絕人每縱酒歌呼意氣蓋世康熙初三藩繼叛靖南王耿精忠作逆於閩招引臺寇鄭經爲聲援經於是屢犯沿海州郡連下城堡十餘是時康親王帥諸將鎮閩戰久不克十八年經復遣其大將劉國軒吳淑何祐等分道入犯海澄公

黃芳世等督兵進剿失利退保海澄縣城國軒環攻之城尋陷全軍盡覆事聞

聖祖赫怒命將致討虎聞慨然曰男兒生當爲世用不於此時殺賊報

國取封侯將何竢乎遂赴福建從軍隸昭武將軍提督楊

捷字元凱奉天人兩任山東全省提督麾下捷故宿將所部皆百戰驍銳

一見虎奇其才勇引置左右每戰先登陷陣常爲衆軍鋒尋以功擢署守備先給劄付時國軒已攻下惠安漳平諸邑自圍漳州遣兵圍泉州而斷漳州之江東橋泉

州之萬安橋以拒大軍捷遣兵復惠安襲破陳山壩奪
二橋漳泉圍解國軒遁還海澄其城三面環海一面復
掘壕引潮以自固並列艨艟守金門廈門諸島相持一
年不決捷與總督姚啟聖大治戰艦水陸夾攻至十九
年始平諸島克復海澄國軒等揚颿出海歸臺灣全閩
底定是役也虎以前鋒力戰功多初破烏嶼海滄諸隘
擣賊中堅又奪取陳洲馬洲觀音獅子二山連拔一十
九寨又攻島克城所向披靡軍中因其名虎稱爲虎將
自將軍以下深倚仗之事平幕府簿錄功狀以聞

聖祖嘉悅超升一十九等加左都督仍錄餘功四次旋以前銜授拱極城游擊拱極城者踞京城西三十里直蘆溝橋爲天下入京孔道時三藩甫定餘孽未殄以京輔右衛故重其選也在任數年晝則訓士夜則譏奸帳下健兒無不一當百郵邸宴如犬不夜吠大帥疏薦擢蔚州參將累遷石匣副將從征噶爾丹事在康熙二十九年與古北口總兵連營出塞旋以班師引還厄魯特之役事在康熙二十四年虎以久將習兵調赴

山尾從西征功績茂著尋因東粵峒獠不靖擢南韶右翼總

兵官便宜鎮撫甫抵任值巨憝關二作亂煽動排猺蝟毛而起部將爭欲引兵入山捕猺以希功賞虎曰猺穴伏巖棲與鳥鼠無異其敢於出山肆掠者奸民導之耳今不先內治而遽謀外攻乎乃託爲編查保甲單騎徧厯里落徐偵關二所在以計擒斬羣醜股慄於是訓練士卒鈐束部伍密探入山路徑曲折盡悉乃簡精銳直擣巢窟深林密箐靡不搜捕誅渠魁寬脅從曾不而月而諸猺懾伏間左獲安旋以母憂歸四十三年五月卒子四人之麟嚴州衛守備之駿平邢關守備之驛武舉

並以右班世其家之荆邑庠生

舊志虎傳漏略已極且不著其年代遂無從悉

其為國朝何時

人今悉考訂補正

贊曰有力如虎乃以虎名立功閩疆萬夫之英初破

烏嶼爰復海澄傾山力戰拔寨先登入衛畿輔出扈

西征南韶開闔號令嚴明立禽巨憝疾雷乍驚羣猺

震懾綏我邊氓

右大小夏侯二疏據前漢書補于禁據三國志補羊

侃及子鷗據泗水書及南史補餘並見舊志

戴祁徐晏劉彬周順續增二疏刪餘沿前志

重增

黃恩彤傳

黃恩彤原名丕範字綺江號石琴別號南雪尙璨孫宗

皋子

尙璨宗皋竝見前志
封贈錄及篤行傳

生而岐嶷穎悟性成五歲偕

胞兄丕節

後更名
恩霽

入家塾讀書寓目不忘有神童之稱

年十五縣試第一學使者考古復列首選補邑諸生益

肆力於學歲科試輒冠其曹旋以優等食餼道光壬午

舉於鄉丙戌成進士以部屬用籤分刑部潛心律例之

學大司寇閩縣陳公

若霖

一見許爲國器時則有戶部

偽照銀庫截餉邪匪傳教三案案各連逮數百人承審者每至束手大司寇特派恩彤讞其獄獨能搜抉弊端指擒首惡窮治黨與次第論如法其株連亡辜悉縱遣之一時翕然稱平允尋充律例館提調總辦秋審減等贖鍰等處先後十餘年治疑獄不可以數計曾以刑曹奉使出塞充熱河都統幕僚佐理三載蒙民悅服代歸送者絡繹過廣仁嶺謝遣始去屢隨大臣之保陽之清江之吳之皖之浙查辦事件具得要領以

聞罪其吏不職者己亥充順天鄉試同考官得士劉祝庚等十

四人庚子充廣西鄉試正考官得士唐啟華等如額旋奉江南鹽法道之

命鹽道以督銷爲職所轄大半在安徽境內蘇省惟江甯一府兼有分巡之責淮綱積弊尤在走私不惟梟匪充斥奸商亦以夾帶爲利藪恩彤乃詳稽成法清理江面嚴覈水程遴委幹員於出江過境鹽船不時抽查起獲商私數十萬劬稟請嚴辦其風頓戢升授江蘇按察使攝理江甯藩篆時嘆咭喇因違禁絕市輒以兵船數百艘騷於沿海入江抵金陵敬關求撫賞大臣雖允其請相持

未決恩彤親見其酋曉以利害結以恩信遂斂舶去又隨大臣赴粵增減稅則酌定善後事宜具載條約復市如初會嘒喃哂咪喇啞諸國續有使臣至撫之如暎均奉約惟謹調廣東按察使升布政使奉

旨辦事認真不辭勞勩賞戴花翎并加隨帶二級旋授廣東巡

撫因俗施治擇要興除粵省地處海疆民風頑悍盜劫拜會打單搶擄等案層見疊出恩彤通籌全局寬備緝捕經費嚴定賞罰章程選派文武設法督同地方官廣購線目兜截搜拏陸續擒獲林大眉黃悟空陳昌基劉

亞聽盧亞音等巨盜數百名盡法懲治匪徒震懾農商
獲安弊革而吏不驚事集而民不擾清而不激嚴而不
刻政績丕著恭逢察典奉

殊諭協力籌維共成敕定著交部議敘蓋異數也尋以主試武
闈爲老生乞恩有違定例部議鑄職留粵差委未及一
年以同知起用

上意眷注未衰而恩彤以親老遵例歸養家食二十年迨養親
事畢年且七十矣遂不復出咸豐中淮匪北擾兩次奉
命督辦團練首建分局之議倡率聯村築堡人共爲守俾

賊無所掠久而自困卒如其策光緒壬午重逢鄉舉之年奉

旨賞還二品銜准與鹿鳴宴年八十三卒恩彤爲人玉色鶴立眉目如畫嗜學若飢渴敷歷中外廿餘年未嘗一日廢讀詩文兼工諸體霽霈芬葩擺脫庸近力追古作者歸田後定省餘暇爲學益勤蒼叢貫串陶冶百家弟子從遊者眾經其嘯呵皆知名當時本邑 修志乘兩次總司筆削無不欽其精核所編文集及雜著百餘卷累數百萬言皆手繕清冊藏於家塾梓行者百不逮一兒

恩霽進士四川卽用知縣

前志有傳
見文學

子二人師閭進士

翰林院編修累官廣西桂林府知府儘先補用道師侃
貢生中書科中書舍人加員外郎銜俱以團練 賞戴
花翎孫五人力田增貢生卽選通判加鹽提舉銜守田
州同銜福田附貢生開田廩生稔田監生

贊曰岱峯嘒業汶派滌淪山川鍾毓篤生偉人郎官
應宿粉署策勲三吳百粵征轡駢駢陸龍警水慄向化
歸仁循陔念切拜表情陳鹿筵周甲

鳳詔重申文章經濟超越羣倫

卷十二終

